

清

史

稿

清史稿

列傳

藩部四

喀爾喀土謝圖汗部

喀爾喀車臣汗部

喀爾喀賽因諾顏部

喀爾喀札薩克圖汗部

土謝圖汗部稱喀爾喀後路至京師二千八百餘里東界肯特山西界翁吉河南界瀚海北界楚庫河元太祖十一世孫達延車臣汗游牧瀚海北杭愛山界子十一格時森扎扎賚爾琿台吉其季也兄圖魯博羅特巴爾蘇博羅特阿爾楚博羅特鄂齊爾博羅特等由瀚海南徙近邊爲內扎薩克敖漢奈曼巴林扎噶特克什克騰烏珠穆沁浩齊特蘇尼特鄂爾多斯九部祖詳各傳獨所部號喀爾喀留故土析衆萬餘爲七旗授子七人領之分左右翼其掌左翼者爲第三子諾諾和及第五子阿敏都喇勒諾諾和號偉徵諾顏子五長阿巴岱號幹齊賴賽因汗次阿布瑚號墨爾根諾顏徙牧圖拉河界今土謝圖汗部二十扎薩克皆其裔阿巴岱子二長錫布固泰號鄂爾齊圖琿台吉爲扎薩克貝子錫

布推哈坦巴圖魯輔國公巴海台吉車凌扎布青多爾濟四旗祖次額列克號  
墨爾根汗爲土謝圖汗察珞多爾濟扎薩克郡王噶勒丹多爾濟貝勒西第什  
哩車木楚克納木扎勒輔國公車凌巴勒三達克多爾濟台吉巴朗班珠爾多  
爾濟辰不勒多爾濟朋素克喇布坦十旗祖阿布瑚子三長昂噶海繼墨爾根  
諾顏號爲扎薩克郡王固魯什喜台吉車凌開木楚克成袞扎布遜篤布五旗  
祖次喇瑚里號達賴諾顏爲扎薩克台吉禮塔爾一旗祖次圖蒙肯號昆都倫  
諾顏裔初喀爾喀無汗號自阿巴岱赴唐古特謁達賴喇嘛迎經典歸爲衆所  
服以汗稱子額列克繼之號墨爾根汗額列克子三長袞布始號土謝圖汗與  
其族車臣汗碩壘扎薩克圖汗素巴第同時稱三汗崇德二年袞布借碩壘上  
書通好二年遣使貢駝馬貂皮雕翎及俄羅斯烏槍命喀爾喀三汗歲獻白駝  
一白馬八謂之九白之貢以爲常順治三年蘇尼特部長騰機思叛逃豫親王  
多鐸率師追勦至扎濟布喇克袞布遣喇瑚里等以兵二萬援騰機思爲大軍  
所敗棄駝馬千餘竄額爾克楚琥爾者袞布族也復私掠巴林部人畜詔使責

之會所部額爾德尼陀音貢馬至敕歸諭其汗等擒獻騰機思并以所掠歸巴林五年騰機思降衮布等表乞罪詔各遣子弟來朝不從八年以其部不歸巴林人畜僅獻駝十馬百入謝嚴諭詰責十年命侍郎畢哩克圖往察巴林被掠人畜衮布等匿不盡給會喇瑚里之子台吉木塔爾攜衆來歸封扎薩克親王駐牧張家口外塔噶渾河因詭言巴林人畜本塔爾盡攜往應就彼取並乞遣本塔爾等還諭曰爾等不遵旨遣子弟來朝不進本年九白常貢不盡償巴林人畜冒此三罪反請遣還來歸之人是何理耶今卽各遣子弟來朝盡償巴林人畜朕亦弗使本塔爾等還爾自擇之是年秋遣使補貢九白至張家口詔勿納十二年夏土謝圖汗察理多爾濟繼其父衮布爲左翼長約同族墨爾根諾顏達爾漢諾顏丹津喇嘛等表遣子弟來朝諭曰爾等遵旨服罪朕不咎既往其應歸巴林人畜缺少之數悉從寬免嗣後逃人至此當卽遣還冬復遣使乞盟許之賜盟於宗人府是年設喀爾喀八扎薩克仍分左右翼命土謝圖汗及墨爾根諾顏各領左翼扎薩克之一十五年遣大臣詹服物資之康熙二十三

年以其部與右翼扎薩克圖汗成食構殺命阿齊圖格隆偕達賴喇嘛使諭解之二十六年察珅多爾濟偕車臣汗諾爾布等疏上尊號諭曰爾等恪恭敬順具見惻忱但宜仰體朕一視同仁無分中外至意自今以後親睦雍和毋相侵擾永享安樂庶慰朕懷勝於受尊號也二十七年厄魯特噶勒丹掠喀爾喀察珅多爾濟拒弗勝偕族弟固嚙什喜等携屬來歸詔附牧蘇尼特諸部界發歸化城倉米贍之二十八年復遣內大臣費揚古往賑諭廷臣曰朕聞土謝圖汗屬衆有乏食致斃者深爲軫念費揚古探買牲畜尙須時日著速發張家口倉米運往散給計支一月牲畜繼之則衆命可活矣二十九年詔察所屬貧戶遣就食張家口三十年春上以察珅多爾濟來歸後車臣汗烏默客扎薩克圖汗成袋子策旺扎布踵至喀爾喀全部內附封爵官制宜更且降衆數十萬錯處應示法制俾遵守將幸多倫諾爾行會閱禮詔理藩院檄察珅多爾濟等隨四十九旗扎薩克先集以俟尙書馬齊奉命往議禮定賞格九等坐次七行以察珅多爾濟爲之首夏四月駕至喀爾喀濟汗濟農諾顏台吉等三十五人以次

朝見諭曰爾等以兄弟之親自相侵奪啓釁召侮至全部潰散其時若令四十  
九旗扎薩克將爾人衆收取爾部早已散亡朕好生之心出於天性不忍視爾  
滅亡給地安置復屢予牲畜糗糧以資贍養用是親臨教誨普加賞賚會同之  
時見爾等傾心感戴特沛恩施俾與四十九旗同列以示一體撫育罔分中外  
爾等其知朕意尋命改所部濟農諾顏舊號封王貝勒台吉有差各授扎薩克  
編佐領仍留察琿多爾濟汗號統其衆自是始稱土謝圖汗部三十一年改喀  
爾喀左右翼爲三路土謝圖汗稱北路三十五年四月上親征噶爾丹所部諸  
扎薩克奏臣等被噶爾丹掠全部潰賴聖主天威正其罪請從征効力諭毋庸  
盡行隨往五月大軍旣破噶爾丹於昭莫多凱旋大賚之明年噶爾丹竄死朔  
漠平詔所部歸圖拉河游牧四十年賜牧產贍給五十四年以準噶爾策妄阿  
喇布坦煽衆喀爾喀命散秩大臣祁德里率大軍赴推河偵禦廷議屯田鄂爾  
坤圖拉裕軍食詔詢土謝圖汗旺扎勒多爾濟勛奏所部可耕地因言附近鄂  
爾坤圖拉之蘇呼圖喀喇烏蘇明愛察罕格爾庫爾奇呼扎布堪河察罕度爾

布拉罕口烏蘭固木及額爾德尼昭十餘處俱可耕命公傅爾丹選善耕人往屯種是年詔簡所部兵駐防阿爾泰六十年命土謝圖汗旺扎勒多爾濟督理俄羅斯邊境事雍正二年北路軍營移駐察罕度爾及扎克拜達哩克三年以增設賽因諾顏部定所部爲喀爾喀後路四年旺扎勒多爾濟等因額爾德尼昭乏相宜穀種遣人購之俄羅斯並請助屯田兵糧諭廷臣曰前議屯田時曾有奏言喀爾喀未必踴躍從事者朕思此舉正爲伊等計及久遠豈有反不樂從之理今果感恩抒誠與朕意相符殊可嘉尙交理藩院議叙尋各予紀錄并資幣有差詔如議五年以庫倫及恰克圖爲所部與俄羅斯互市地詔非市朝毋許俄羅斯踰楚庫倫河界是年賽音諾顏親王額駙與俄羅斯定界九年選兵隨大軍勦勒丹策凌十三年徵大軍還詔所部兵留駐鄂爾坤及烏里雅蘇臺乾隆元年復選兵赴鄂爾坤防秋六年命參贊大臣都統塔爾瑪善察閱防秋兵於烏克圖爾額爾哈朗以哲布尊丹巴呼圖克圖移居庫倫命土謝圖汗敦丹多爾濟駐守其地護視之十三年選駝五百運歸化城米赴塔密爾軍營

命土謝圖汗延丕勒多爾濟督理俄羅斯邊境事十七年增防鄂爾坤兵十九年移駐鄂爾海喀喇烏蘇是部扎薩克親王額琳沁多爾濟授西路參贊大臣二十年進勦達瓦齊於伊犁時降酋阿睦爾撒納謀據伊犁上燭其奸詔入覲定北將軍班第由尼楚克軍營遣額琳沁多爾濟護之行至烏隆古河阿睦爾撒納以北路定邊左副將軍印授之詭稱歸治裝由額爾齊斯河馳遁翌日額琳沁多爾濟追之弗及論罪削爵擬斬諭賜自盡多羅貝勒車布登亦以駐防庫克嶺不力追叛遁之巴朗降貝子而扎薩克輔國公車登三丕勒以俘青衷雜卜功扎薩克一等台吉達什旺勒以擒叛遁之和碩特訥默庫功扎薩克一等台吉班珠爾多爾濟以獲阿睦爾撒納旗纛甲冑功扎薩克一等台吉三都布多爾濟以赴扎布堪獲阿睦爾撒納之孛及班珠爾等並誅叛賊固爾班和卓輩功均進爵賞賞有差先是土謝圖汗部編佐領積三十七旗以分置賽因諾顏部析二十一旗留十六旗仍隸土謝圖汗部尋曾四旗扎薩克凡二十盟於汗阿林設正副盟長及副將軍參贊各一府二十有一土謝圖汗一扎薩克



和碩親王一由貝勒晉襲附公品級一等台吉一扎薩克多羅郡王二一由貝勒晉襲扎薩克固山貝子二一由郡王降襲一由扎薩克台吉晉襲扎薩克輔國公六三由扎薩克台吉晉襲扎薩克一等台吉八一由貝子降襲是部本爲喀爾喀四部之首內則哲布尊丹巴住錫庫倫外則隣接俄羅斯有恰克圖互市形勢特重號稱雄劇乾隆二十七年於是部中旗汗山北之庫倫置辦事大臣以滿洲大員任之別選蒙古汗王公扎薩克一人爲辦事大臣同釐其務和碩親王多羅額駙桑齋多爾濟以乾隆二十三年赴庫倫協理俄羅斯邊境事二十七年停互市二十九年桑齋多爾濟請增庫倫卡坐派兵屯田依率布爾噶勒台等處不許三十年六月命阿里衮索琳查辦恰克圖潛通貿易一案以桑齋多爾濟私聽蒙人仍與俄商貿易論罪削爵辦事大臣丑達以私市得賄正法十月以是盟扎薩克貝子伊達木什布管俄羅斯卡坐三十三年庫倫辦事大臣慶桂等奏俄羅斯遣使乞開關交易允之仍申內地商人圖增價值之禁尋命桑齋多爾濟復任四十二年定庫倫辦事大臣兼轄辦事章京民蒙交

涉事件均具報辦理例四十三年桑齋多爾濟奏俄羅斯人私越邊口賣馬俄員瑪玉爾不肯前來暫停貿易咨示俄固畢納固納爾上是之七月諭桑齋多爾濟會同辦事大臣博清額商辦內地商人給還俄羅斯欠貨十一月桑齋多爾濟卒命土謝圖汗車登多爾濟往庫倫協同博清額辦事四十五年復開市四十八年以車登外爾濟私給乘騎烏拉黃緞照票罷庫倫辦事大臣命賽因諾顏親王拉旺多爾濟代之仍命桑齋多爾濟之子郡王蘊端多爾濟隨同辦事定喀爾喀四部烏拉章程十二月命蘊端多爾濟列名在辦事大臣勅保之前四十九年以俄羅斯屬布里雅特人劫內地往烏梁海貿商民賠貨而不交犯屢檄其國五十年春以俄羅斯覆文支吾推宕復停恰克圖互市辦事大臣松筠因定沿邊蒙古需用烟茶布疋章程五十一年九月定土車兩部及賽扎兩部每年各帶一部人入圍場土車兩盟部落人交庫倫辦事王大臣勞頌習圍賽扎兩盟部落人仍交烏里雅蘇台將軍大臣帶頌習圍並令部落每年白汗王至公各揀派一人台吉內各揀派四人領職銜較大者二名微末台吉二

名仍作十名善射赴木蘭圍場例五十四年俄屬布里雅特人傷我出卡巡兵松筠檄俄固畢納北爾捕送置之法適有自俄歸之士爾冠特喇嘛薩麻林言俄將興兵構畔廷旨命松筠檄詢五十五年是部戈壁數旗災扎薩克台吉烏爾洪扎布報以應收賦及自畜牛羊賑給並令有力台吉官兵關恤貧者事聞上嘉之五十六年松筠奏俄守邊目力辨其誣詔誅薩馬林許俄復市松筠與接任辦事大臣普福協辦貝子遜都布多爾濟恰克圖曉諭俄畢納固托爾圖後如遇會辦事件應如例迅速完結命盜案犯應送恰克圖鞫實正法彼此約束商販毋有積欠因與立約永爲遵守嘉慶七年三月土謝圖汗車登多爾濟等備行圍進哨馬匹上嘉之八月定土謝圖汗車臣汗二部事務在庫倫會集與辦事大臣一同辦理例自是土車二部重大事件皆由庫倫辦事大臣專奏允蘊端多爾濟請每逾十年巡察俄羅斯交界卡論一次八年八月允蘊端多爾濟請土謝圖汗部扎薩克齊旺多爾濟齊巴克扎布等旗及哲布尊丹巴呼圖克圖徒衆所屬地方免驅逐種地民人禁嗣後另墾地畝添建房屋侵占游

牧並令從前租種者按地納租娶蒙古爲妻者身故之後妻子給該處扎薩克爲奴隸呼圖克圖徒衆地方卽爲其所屬並定該處居民按人給照每年由蘊端多爾濟派員檢查造冊報院及再有無照之民任意棲止盟長扎薩克等治罪例二十三年庫倫遣蒙員同俄員勘河疆界道光四年三月以庫倫章京尙安泰查驗伊琿等處種地民人不能核事致民人等盤踞游牧署車凌多爾濟扎薩克印務之台吉貢蘇倫呈報驅逐又誤燬領照人民房屋命奪職蘊端多爾濟等議處仍申各旗容留無票民人之禁七年蘊端多爾濟卒以綸布多爾濟代爲庫倫辦事大臣十二年多爾濟拉布坦代之十五年多爾濟拉布坦奏喀爾喀招民墾復拋荒地畝章程諭不許十二月命德勒克多爾濟爲庫倫學習辦大臣十八年多爾濟拉布坦奏管下倫扎薩克那木濟勒多爾濟擅以奇爾渾卡倫兵丁與明濟卡倫兵丁互相移駐撤差仍議處十九年允哲布尊丹巴往庫倫之北伊魯格河溫泉坐湯命辦事大臣福英護視四月多爾濟拉布坦卒以德勒克多爾濟代爲庫倫辦事大臣二十一年六月俄羅斯薩特納

衙門咨理藩院聞中國嚴禁鴉片入界已諄飭所屬不得在交年之處互相販帶偷運諭庫倫辦事大臣嚴禁內地貿易人等在交界處所私行販運烟土以緩外藩除積弊二十二年九月德勒克多爾濟以庫倫地方商民盤踞一案下部議處咸豐四年土謝圖汗車臣汗兩部汗王公台吉等請捐助軍需溫旨卻之八年允俄羅斯使人由庫倫至張家口入京十一年德勒克多爾濟遷以多爾濟那木凱代爲庫倫辦事大臣尋令車臣汗阿爾塔什達代之以辦事大臣色克通額帶操演烏槍兵丁赴恰克圖命多爾濟那木凱妥辦庫倫事件四月色克通額奏俄商欲於庫倫貿易行文阻止六月總理各國事務王大臣奏准俄人在庫倫修理公館十一月色克通額奏俄商擅往蒙古各旗貿易諭守約開導並交總理各國事務衙門照會俄使禁阻十二月撤恰克圖習槍官兵同治元年定俄國陸路通商章程條款三年以新疆回亂調土謝圖汗車臣汗兩部蒙兵赴烏魯木齊等處助勦四年三月以土車兩盟蒙兵潰散回旗諭文盛等不必再令赴營以圖盟援古城蒙兵逗留扎薩克達爾瑪僧格嚴議五年命

辦喀爾喀四盟捐輸六年調土車兩盟兵一千五百名駐防卡倫八年改訂中俄陸路通商章程兩國邊界貿易在百里內均不納稅俄商許往中國所屬設官之蒙古各處亦不納稅其不設官之蒙古地方該商欲前往貿易亦不攔阻惟該商應有邊界官執照九年二月回匪東竄自三音諾顏左翼右旗扎薩克阿巴爾米特游牧擾是部左翼後旗鎮國公巴勒達爾多爾濟游牧辦事大臣張廷岳等奏蒙古地方幅員遼闊蒙衆皆擇水草旺處游牧相距數十里始有厓廬且百餘年安享太平久不知兵賊知蒙古易欺是以百數成羣縱橫肆擾擬調駐卡倫蒙兵撤兩部落盟長等帶往西南一帶與各旗官兵協勦庫倫地方塔廟甲于各旗商賈輻輳人烟稠密現派桑卓特巴等調集喇嘛鄂拓克防護廟宇又令商民辦理保甲以資守禦六月張廷岳等奏以土盟兵九百名交扎薩克公奈當等防守額爾德尼昭七月俄調馬隊在庫倫操演諭張廷岳等查察尋以烏里雅蘇台危急張廷岳等奏調土車兩盟兵會勦十二月請以賽扎兩盟協防庫倫官兵二百名歸併賽扎兩盟派兵分防要隘十年二月回匪

復竄額哲呢河一帶圖犯庫倫張廷岳等奏迅檄達爾濟等軍赴哈爾尼敦西北地方防勦十年張廷岳奏前調土車兩盟官兵餉糈上年由兩盟捐輸支給烏城被陷復奏調內地官兵來庫防勦檄土車兩盟及沙畢捐備馬三千匹資漢兵騎乘又借僱駝馬數千隻分赴各台兩盟官兵自上年遣散改征作仿應需駝馬三千餘隻亦係各旗撥派四月回匪竄是部左翼中旗郡王拉蘇倫巴咱爾游牧營掠府廟東犯莫霍爾順等台張廷岳遣蒙員札齊魯克齊伯克瓦齊爾等追敗之於烏拉特中旗沙巴克烏蘇地方六月副都統杜嘎爾奏回匪於四月由圖盟公巴勒達爾多爾濟游牧竄出順新地方五月竄郡王拉蘇倫巴咱爾游牧之巴爾圖叟吉地方派吉爾洪額帶隊改道躡賊時回匪復西竄左翼中左旗扎薩克達爾瑪僧格游牧至烏拉特中公旗之布特拉地方吉爾洪額會伯克瓦齊爾進擊大勝之八月回匪復竄是部左翼後旗公巴勒達爾多爾濟游牧直趨翁吉河一帶別股竄哲林等台賽爾烏蘇西北台路斷張廷岳等奏察哈爾所派達爾濟一軍抵翁吉河之烏勒幹呼秀地方與是部左

翼中左旗公齊莫特多爾濟及伯克瓦齊爾二營相犄角是月二十一伯克瓦齊爾敗賊於察布察爾台之察罕吉哩瑪地方二十六日卯刻伯克瓦齊爾星夜由間道竊追繞出東犯庫倫匪前敗之于阿達哈楚克山嶺里音華地方午申刻連再捷獲駝千餘馬四百圍賊于畢留廟相持六晝夜九月二日達爾濟軍至畢留廟西北駐營匪以投誠誑之達爾濟遽阻伯克瓦齊爾軍巡邏匪于是夜輕騎西遁十二月張廷岳等奉前竄烏庫兩城回匪現均返贛州老巢宣化古北口二軍於本年到庫擇要設防足資捍衛土車兩盟官兵擬裁半留半每屆半年輪換防護官署昭廟撤沙畢兵十一年二月回匪復擾左翼後旗公巴勒達爾多爾濟游牧尋遁三月張廷岳等奏庫倫事務較繁請土車兩盟之協理將軍飭令每年輪班在庫聽候差委勿赴烏城下金順等會商覆奏諭催山東於五月前解清庫餉銀十萬兩資庫倫商民團勇定變通辦理庫倫軍需章程十三年九月庫倫辦事大臣阿爾塔什達卒以那木濟勒端多布代之光緒元年以庫倫解嚴撤回直隸古北口練軍四年十一月以庫倫哈拉河等



處游匪尙多仍撥直隸宣化練軍二百五十名駐之五年二月以穆圖善奏諭飭土謝圖汗迅將撤回托里布拉克圖固里克二臺幫臺官兵駝馬催令仍回本臺五年予指輸銀兩之土謝圖汗那遜締克圖等獎六年正月以改議俄國歸還伊犁條約籌備邊防派土車二盟兵二千蒙兵駐庫倫撥軍火及備蒙古包銀十二月給庫倫防兵月餉七年二月撤駐庫倫蒙兵四月以庫倫爲俄人來往衝途調喜昌爲庫倫辦事大臣統新軍千人赴之是年中俄訂結改陸路通商章程俄國商民往蒙古貿易者祇能由章程附清單內卡倫過界應有本國官所發中俄兩國文字並譯出蒙文執照註明姓名貨色包件牲畜數目於入中國邊界時在卡倫呈驗其無執照商民過界任憑中國官扣留八年四月喜昌奏昌奏庫倫時勞邊防情形量議變通一庫倫與恰克圖屯軍分駐一恰克圖改設道員鎮守邊塞一庫倫選練土著學試屯墾一庫倫屬境暨接連隣省地方酌量屯兵下所司議格尋以喜昌奏劾土盟盟長車林多爾濟罷之並下理藩院議注銷土車兩盟王公等駐班烏里雅蘇台盟之案八月喜昌等奏

庫倫近與俄隣爲漠北第一咽喉現駐兵設防饋運轉輸舊站繞遠亟宜變通改設捷徑諭飭烏里雅蘇台將軍察哈爾都統迅速妥籌覆奏九年二月喜昌奏臺站迎滯擬飭運草養駝以資供應併陳報災不實等情諭綏遠城將軍豐紳等按照原奏斟酌妥辦三月察哈爾都統吉和等奏霍穆爾噶順等九臺之官兵潛逃詔喜昌等飭各旗竭力供差不准推卸仍嚴禁兵丁騷擾臺站八月察哈爾都統吉和等奏撫恤荒災安設臺站喜昌又劾車林多爾濟權勢大重把持公事串通各旗虛報災荒遣撤官兵需用駝隻復爲掣肘各旗派撥幫臺延不到差諭新任辦事大臣桂祥密查具覆時俄勢日盛諸部王公漸生攜貳喜昌所議置官駐軍屯田改臺諸大端皆以消患未萌中朝重更張致所請無一行者卒以病去併撤其軍辛亥之變質釀於此識者惜之九月喜昌奏飭圖什業圖汗部未被災各旗暫行幫臺葺庫倫辦事大臣那木濟勒端多布兌以土謝圖汗那遜綽克圖代之十年正月以土謝圖汗部左翼中郡王阿木噶巴扎爾等四旗被災特重諭桂祥等妥籌減緩差徭予勸捐賑災之哲布尊丹巴

呼圖克圖扁額十二年桂祥劾哲布尊巴之商卓特巴索訥木多爾濟居心巧詐意構邊畔革之十六年八月庫倫辦事大臣安德等奏庫倫所屬恰克圖等處開辦金礦華商既無可招洋商則斷不可招集陳窳礙難行情形下所司知之十二月御史聯陔奏庫倫商卓特巴喇嘛達什多爾濟欺朦把持擅權科歛下理藩院十八年七月定聯接中俄陸路電綫哲布尊丹巴所住之廟被火佛像經卷皆燬土盟等四盟王公捐助重建而商卓特巴以此假貸商人攤派沙畢者遂重二十年九月安德奏日本變動民情惶惑請仍調官兵駐庫倫諭李鴻章酌度二十二年六月庫倫辦事大臣桂斌奏哲布尊丹巴呼圖克圖屬沙畢一項困苦特甚流亡過多呼圖克圖忠厚存心用人失當一任喇嘛等勾通內地商民以及在官人等百力詐取若罔聞知迨用度過窘不得不加倍苛派所由欠負業業上下交困體訪其屬堪布喇嘛諾們汗巴勒黨吹木巴勒爲僧俗所仰慕應責成清理已檄署商卓特巴巴特多爾濟等凡一切商上應辦事宜悉心諮商妥爲籌畫先將沙畢等應派光緒二十二年分攤欸查照十年以

前各按牲畜多寡秉公勻攤不准加派核實的裁近年增添浮費務量所攤攤節動用俾紓民力並請將東營台市甲首各商每遇兩大臣節壽酬款項不減不增按年代哲布尊丹巴歸商欠下所司知之尋又奏定恰克圖規費化私爲公提滿蒙大臣經費七月奏請定庫倫大臣與哲布尊丹巴呼圖克圖往還體制是否平行有曰公事之間備極融洽相見之際多似參商實則哲布尊丹巴已驕蹇跋扈與辦事大臣積不相能十一月桂斌奏土盟所屬西北旗界哈喇河一帶向有開墾地畝播種雜糧曾經奏明不准續墾每屆台市章京更換實任由庫倫大臣扎委會同扎薩克等前往清查有無續墾茲屆應查之期照章派委台市章京理藩院員外郎奎顯往查將所得陋規呈請核辦約計二千數百兩當將兩大臣此次欸費全發商人收還其餘各項暫照成案分資各員俾資津貼二十三年六月辦事大臣連順奏哲布尊丹巴呼圖克圖與蒙古辦事大臣圖什業圖汗那遜納克圖兩不相能請革辦事大臣之任諭從之以飭嗣後遇有此等事件務妥爲斟酌勿聽呼圖克圖一面之詞以土盟中旗貝子朋

楚克車林爲庫倫辦事大臣連順以桂斌所奏歸還哲布尊丹巴商欠辦法四成實銀分年帶銷雖恤蒙情未恤商情致該商等虧累太多不敢與沙畢內外兩倉及鄂拓克交易而兩倉鄂拓克雖有牲畜無處易換市井蕭條諸貨不能暢銷現呼圖克圖之廟工久竣應照桂斌所奏不得苛派休息蒙衆兩倉所用貨物銀茶及鄂拓克息借之款應循舊日章程設法算撥又奏據土盟盟長密什克多爾濟轉據各旗呈報現查各旗呈報並無未領限票民人種地之事其由庫倫台市章京衙門請領限票來旗貿易者均隨來隨往或搭蓋土房存貨收賬牛羊並不孳生墾荒地民人建房養畜每年交地租茶數十箱或百箱不等復據商民元順明等七家呈認種荒地每年有地租茶牲畜存廠每年有草廠茶請將認交前大臣桂斌罰款原茶交還旨均如所請並將查地陋規化私爲公裁台市章京查地之差二十四年勦辦昭信股票連順奏圖什業圖汗車臣汗兩部落王公及哲布尊丹巴呼圖克圖等情願報効市平銀共二十萬兩五月土車兩盟王公及哲布尊丹巴沙畢喇嘛等陳請不願領昭信股票溫諭嘉

之仍飭一併給獎以設庫倫恰克圖電綫理藩院奏採伐土盟各旗官山木植先是庫倫西北各旗至恰克圖一帶內地人民率以租地墾荒爲名偷挖金砂俄人亦多越界潛探查禁驅逐具文而已至是連順奏土車兩盟各旗界內庫倫東北六台地約合三百四十餘里西自鄂爾河哈拉河至額能河共有金礦三處又西北九台地約合五百三十餘里北自色埒河至伊魯河共有金礦二處周圍二百餘里金苗甚旺以伊魯河所產爲最佳惟產自河內水勢頗深人力掘取所得有限必用西法以機器汲水僱工開挖其利方厚似招集鉅款延聘礦師購運機器相地開採宜同時舉辦於居中扼要之處設一總廠綜計成本約需銀三百萬兩復據天津稅務司俄人柯樂德利庫西稱蒙古金礦中國集款興辦時俄人亦願附股仍可代爲招集嚴遵中國章程如用俄人應聽中國官員約束通盤籌畫鄂爾河等五處金礦擬請招商集款合力開採由中國自行舉辦並准附招俄股請簡派大員專司督率下總理各國事務衙門會同鑛務大臣議行尋命連順督辦蒙古鄂爾河等是年李鴻章等奏中俄會訂條

約俄國准在中國蒙古地方貿易其蒙古各處及各盟設官與未設官之處均准貿易照舊不納稅其買賣貨物或用現錢或以貨易貨均可並准俄民以各種貨物抵賬在庫倫設領事科布多烏里雅蘇台俟商務興旺添設二十五年十月奏集股開採以土車兩盟同時共舉爲宜卽集土車兩盟長切實勸諭俾知開礦之舉不特保衛邊疆且開蒙古生計報聞土盟盟長密什克多爾濟以連順等劾阻撓開礦罷之十一月洛布桑達什面謁哲布尊丹巴以玩藝黃教議處理藩院奏蒙古王公等請停辦鑛務命崑岡裕德往查辦並諭順連緩辦庫倫鑛務十二月庫倫恰克圖電綫工竣二十六年崑岡等奏停辦鑛務連順下部議處拳匪事起命辦事大臣豐陞阿等備邊二十七年三月豐陞阿瑚楚克東林奏圖什業圖汗部落盟長貝子棟多布等呈駕幸西安請捐本年應得俸銀緞疋並量力捐馬備用哲布尊丹巴呼圖克圖等亦呈捐馬千匹均允納之六月豐陞阿等奏上年內地拳匪肇禍猝啓兵端庫倫恰克圖等處中外各商紛紛遷徙互相疑懼當與駐庫俄領事官施什瑪勒福等再三晤商均能奉

約惟謹力顧邦交彼時雖有俄兵防守尤能實力保護中外商民蒙衆等性命  
貲財兩不相擾請予寶星尤之二十九年二月以防守邊疆異常出力予土盟  
盟長扎薩克敦都布多爾濟雙眼花翎土盟參贊郡王阿囊達瓦齊爾紫翎土  
副盟長扎薩克鎮國公察克都爾扎布土盟副將軍親王杭達多爾濟總管西  
卡倫額魯特扎薩克貝子達克丹多爾濟乾清門行走餘給獎有差閏五月土  
盟王公及哲布尊丹巴等報効修正陽門工程銀九核給獎敍豐陞阿等奏覆  
改設行省以外蒙地方與內地邊疆情形不同一例辦理多有窒礙得旨是下  
所司知之九月烏里雅蘇台將軍連順等奏土車二盟金鑲續議開辦參酌外  
蒙等情形詳訂章程妥籌布置請准派稅務司洋員柯樂德爲總辦並簡派大  
員專司督率下部議十一月以蒙古辦事大臣朋楚克車林自庚子以來慎固  
邊圉輯睦外人恤商撫蒙勤勞足錄予紫綬三十年辦事大臣德麟奏庫倫後  
地蒙民租佃擬設清墾局以杜與外人私墾下戶部議三月德麟等奏辦庫倫  
統捐達賴喇嘛以印藏啓辟避之庫倫詔延祉迎令赴西甯九月予駐庫倫直



隸練軍官弁獎以保衛蒙商防護外人十月德麟奏結圖盟左翼中旗扎薩克郡王阿囊塔瓦齊爾借案三十一年辦事大臣模壽奏創辦盤金委差官賈得勝等分往頭台暨恰克圖等處帶兵稽查偷漏分段彈壓七月以理藩院奏哲布尊丹巴呼圖克圖女徒察汗達拉額爾德尼車臣名號十二月設庫倫巡警兵丁由蒙人揀選三十二年六月以土盟王公等承購練兵戰馬依限選齊予盟長公銜扎薩克一等台吉敦都布多爾濟等獎有差三十三年四月九開辦庫倫金鑛定權限章程以庫倫蒙古辦事大臣朋楚克車林會同延祉督辦鑛務三十四年二月辦事大臣延祉以派員勘丈各旗墾地親王杭達多爾濟旗台吉巴圖巴魯抗不備台請嚴加議處允之五月增開依拉裕格倫南之克勒司八月試辦庫倫土藥統稅設蒙養學堂就選土車兩盟及沙畢幼童專習滿蒙漢語言文字以興辦新政蒙古通曉漢文漢語少易致隔閡宣統元年閏二月延祉等奏准設庫倫理刑司員時哲布尊丹巴呼圖克圖之商卓特巴巴特瑪多爾濟捐學堂經費八千兩延祉爲請賞帶駝駟往得旨下理藩院核給獎

叙十一月以庫倫各廠所出金砂較往年暢旺給監辦官等花紅二年五月辦事大臣三多以土車兩盟沙畢等三處屢報災禱供億過繁歷年息借華俄債欸迭經報官索欠者約計不下百餘萬兩竟有佔一旗之牲畜不足抵借者而自供哲布尊丹巴外光緒二十九年至宣統元年庫倫大臣等修理衙署及器具鋪墊等項已合銀十八萬餘兩支應馬匹食羊柴炭等項尙不在內因奏核定土車兩盟沙畢供庫倫大小衙門柴炭羊數目及限制各官調任修署添物章程其餘差使統由各員自爲籌備並以物價昂貴費用竭蹶請加各員公費銀一萬二千兩先儘庫倫外銷公欸項下開支倘有不敷由庫倫金鑛稅欸暫撥仍言金鑛逐年漸有起色蒙因一蘇商務亦可興旺稅額自必加增解部之欸不至較往年爲細下度支部議行清中葉後諸邊將軍大臣以下俸給過薄皆倚藩部供應爲生計三多此疏可以例之十月三多奏喇嘛登曾奪犯拒捕一案商卓特巴巴特瑪多爾濟迄不交出首要歷次呈文無理取鬧要挾其奏恐國家法令官長政權將難行於蒙地請予斥革哲布尊丹巴自二月奉嚴加

約東電旨後庫屬喇嘛安分守法爲近年所未有請傳旨嘉獎均允之二年四月是部親王朋楚克車林爲資政院欽選議員三年設庫倫審判各廳軍諮府亦於庫倫設陸軍兵備處派員統兵駐之是年正月三多奏宣統二年金鑛應繳官稅計金砂易銀十九萬三千兩有奇全數作爲庫倫辦軍事的款是月開圖盟扎薩克那木薩賴旗奎騰河金鑛四月開雅勒河克金鑛閏六月已革商卓特巴巴特瑪多爾濟報効辦理新政銀二萬兩三多請賞還原銜飭回庫倫署商卓特巴篆務以是款作爲修汽車路之需八月春近來邊事日急今沿途台站於來庫倫官員則多方留難於遞庫要件則任意玩忽請飭該管台站認真整頓允之九月三多等以額爾德尼車臣報効銀一萬兩奏准用杏黃圍車時哲布尊丹巴與三多不協是部親王杭達多爾濟等以債務素密結俄人不悅新政於是俄照會外務部有不駐兵不派官不殖民之要求泊武昌事起各省鼎沸杭達多爾濟等遂於十月初九日擁哲布尊丹巴稱尊號建元立國置內閣以喀爾喀八十六扎薩克名義通牒中外指斥清廷興復元業驅逐在外

蒙之滿清官兵三多被迫去職賽爾烏蘇管站站員亦于十二月去職於是喀爾喀四部舉非清有是部地兼耕牧鑿產林木均稱饒富佐領共有四十九車臣汗部稱喀爾喀東路至京師三千五百里東界額爾德尼陀羅海西界察罕齊老圖南界塔爾衰柴達木北界溫都爾罕元太祖十七世孫阿敏都喇勒有子謨囉貝瑪駐牧克魯倫河生子碩壘始號車臣汗與其族土謝圖汗衰布扎薩克圖汗素巴第同時稱三汗子十一今車臣汗部二十三扎薩克皆其裔長嘛察哩號伊勒登土謝圖爲扎薩克貝子達哩台吉旺扎勒扎布二旗祖次察布哩號額爾德尼台吉爲扎薩克台吉吹音珠爾一旗祖次拉布哩號額爾克台吉爲扎薩克台吉色稜達什一旗祖次本巴號巴圖爾達爾漢理台吉爲扎薩克鎮國公車布登一旗祖次巴布襲父汗號爲車臣汗烏默克扎薩克郡納木扎勒朋素克台吉翰寶羅卜藏垂扎木素額爾德尼根敦八旗祖次緯斯嘉布號額爾德尼理台吉爲扎薩克輔國公車凌達什台吉多爾濟達什固噴扎布三旗祖次巴特瑪達什號達寶理台吉爲扎薩克貝勒車布登輔國公車

凌旺布台吉車凌多岳特三旗祖次車布登號車臣濟農次阿南達號達賚濟  
農次布達扎布號額爾德尼濟農均封扎薩克貝子阿南達子貢楚克授扎薩  
克台吉又自爲一旗初喀爾喀服屬於察哈爾天聰九年大軍平察哈爾車臣  
汗伯壘偕烏珠穆沁蘇尼特諸部長上書通好貢駝馬崇德元年春以其部私  
與明市馬諭責之曰明朕警也前者察哈爾林丹汗貪明歲幣沮朕伐明且欲  
助之朕故移師往征天以察哈爾爲非故以其國予朕今爾與明市馬是助明  
也爾當以察哈爾爲戒其改之傾壘遣偉徵喇嘛等來朝請與明絕市上嘉之  
命察罕喇嘛往督貂服朝珠弓刀金幣二年獻所產獸曰獺喜三年獻馬及甲  
冑貂皮雕翎俄羅斯烏槍回部弓箠鞍轡阿爾瑪斯斧白鼠裘唐古特元狐皮  
詔歲貢九白他物毋入獻順治三年傾壘誘蘇尼特部長騰機思叛遣子本巴  
等以兵三萬援大軍敗之師旋詔責傾壘曰蘇尼特本察哈爾屬部向化來歸  
爾誘之使叛朕遣兵追勦時猶誡勿加兵於爾詎意爾反稱兵抗拒以致上蒼  
降譴立見敗衄儼非朕飭令班師大兵旣壓爾境何難長驅直入耶今爾若知

自悔欲贖前愆其速擒騰機思來獻五年騰機思乞降碩壘遣使獻駝百馬千入謝詔遣子弟來朝九年以妄爭歲貢賞諭責勿貢十二年巴布繼其父碩壘爲車臣汗遣子穆彭墨爾根楚琥爾來朝詔宥前罪貢九白如初是年喀爾喀左右翼設八扎薩克命車臣汗領左翼扎薩克之一十五年遣大臣齋服物諭寶之康熙二十一年以所屬巴爾呼人私掠烏珠穆沁部界議增汛兵嚴防禦會貢使至諭曰朕聞爾屬衆與界內蒙古互相竊奪彼此効尤恐乖生計朕已飭界內人毋許出境滋擾爾亦當約束所屬守分安居違者卽拘治之毋稍姑息二十二年詔毋越噶爾拜瀚海游牧巴布卒子諾爾布嗣車臣汗二十六年借土謝圖汗察珞多爾濟表上尊號諭卻之二十七年噶爾丹掠喀爾喀至克噶倫河時諾爾布及長子伊勒登阿喇布坦相繼卒孫烏默客幼台吉納木扎勒等攜之來歸從衆凡十萬餘戶詔附牧烏珠穆沁諸部界烏默客襲汗號如故尋理藩院奏降衆日多請授納木扎勒等爲扎薩克轄之報可命科爾沁親王沙津等往示內地法度諭曰朕因爾等爲厄魯特所掠憐而納之今觀爾等

並無法制約東部曲恐劫奪不已離析愈多爰命增置扎薩克分掌旗隊禁止盜賊各謀生業爾等果能遵而行之寇盜不興禍亂不作庶副朕撫育歸降愛養羣生之至意二十九年選所部兵赴阿拉河隨尙書阿喇尼偵禦噶爾丹三十年駕幸多倫諾爾會閱詔封王貝勒貝子台吉有差各授扎薩克編所部佐領而以車臣汗烏默客統其衆自是始稱車臣汗部三十一年定所部爲喀爾喀東路三十四年遣官往購駝馬三十五年上親征噶爾丹師次克噶倫河烏默客等以兵從凱旋所部沿途慶獻日億萬計明年詔歸克噶倫河游牧五十五年諭所部選駝六千以兵五千領之由郭多里巴勒噶遜運軍糧赴推河六十年調兵防護烏梁海降衆於巴顏珠爾克雍正九年選兵三千赴察罕度爾軍營從勦噶爾丹策凌十一年復詔以所部兵千屯游牧西界訓練防守並追緝巴爾呼逃衆十三年撤還乾隆元年選兵赴鄂爾坤防秋六年命參贊大臣都統塔爾瑪善察閱防秋兵於塞勒壁口十三年選駝五百運歸化城米赴塔密爾軍營十七年選兵四千駐防巴顏烏蘭二十年隨大軍勦達瓦齊於伊犁

二十一年以所屬齊木齊格特人肆竊命參贊大臣納穆扎爾等往緝實之法諭扎薩克等曰朕因爾等不善經理游牧以致盜賊肆行特命大臣前往督緝念皆起於飢寒復令發帑賑給貧戶以贍生業爾等游牧始皆密謐爾等習於玩愒徒知盜賊已除不復爲貧者籌畫生計又或目前尙知約束日久漸至廢弛當各統率所屬詳察貧困之由俾謀生有策不至爲非卽有頑悍不悛之徒亦當嚴加約束有犯必懲務令上下安全共享昇平之福蕩平準部之役是部扎薩克郡王巴雅爾什第扎薩克輔國公達爾濟雅均以俘叛賊包沁副總管阿克珠勒等功巴雅爾什第晉親王達爾濟雅晉貝子扎薩克一等台吉成賚扎布多爾濟以察逆賊青衿咱造僞符徵汛兵之詐督兵嚴守各汛予公品級而貝勒旺沁扎布以死事伊犁子優卹先是車臣汗部編佐領置十一旗後增十二旗扎薩克二十有三盟於克噶倫巴爾河屯設正副盟長各一副將軍參贊各一爵二十有六車臣汗一附輔國公一扎薩克和碩親王一由郡王晉襲扎薩克多羅卻王一附多羅貝勒一扎薩克多羅貝勒一扎薩克固山貝子二



一由貝勒降襲扎薩克鎮國公一扎薩克輔國公二一由貝子降襲公品級扎薩克一等台吉一扎薩克一等台吉十三一由貝子降襲二由輔國公降襲附鎮國公一由貝子降襲二十五年八月命車臣汗部落一體與土謝圖汗等三部落充派兵諸差三十年以是部扎薩克貝子旺沁扎布能約束屬下捕獲私質俄羅斯民人蒙古等上嘉之四十七年是部郡王桑齊多爾濟旗與黑龍江屬之呼倫貝爾巴爾虎爭界謂呼倫貝爾總管將音陳阿魯布拉克等卡倫私自挪移四十八年呼倫貝爾總管三保會桑齊多爾濟及貝勒車凌多爾濟帶同耆老斟酌地圖由界內挖出舊設卡倫所埋記木貝勒車凌多爾濟將所屬人等全行收回桑齊多爾濟仍稱阿魯布拉克一卡往外展佔五十里五十年黑龍江將軍恒秀等查辦是部人等報稱阿魯布拉克卡並未展佔越桑齊多爾濟坐罰俸咸豐四年正月是部車臣汗阿爾罕什達捐銀助軍受之却王公等捐軍需之請同治三年是部郡王等旗又與黑龍江巴爾虎爭界尋命吉林將軍包保勘之三年調是部兵援古城潰歸四年札薩克車林敦多布以逗留

嚴議六年調車盟兵戍卡倫九年回匪東擾圖盟是部供軍需增成役應捐輸勞費圖盟等九年十月庫倫辦事大臣張廷岳等以回匪東擾烏里雅蘇台境奏派是部貝勒幹丹准車林赴額爾德尼昭會勦尋撤回十年六二以回匪踞圖盟左翼中旗郡王拉蘇倫巴咱爾游牧圖犯庫倫又派幹丹准車林統駐庫蒙兵赴噶爾沁圖里克托里布拉克二臺協勦十二月以竄烏庫兩城回匪均回肅州老巢撤車盟官兵一半二月張廷岳以烏里雅蘇台將軍全順西征催庫倫籌備駝隻張岳派員赴圖車二盟勸諭各王公等竭力捐助光緒七年以改議俄約調車盟兵駐庫倫尋以約定撤之二十二年將軍崇歡以烏里雅蘇台參贊大臣攤車盟規費特重請禁之庫倫辦事大臣桂斌以車臣汗阿爾塔什達任參贊大臣作俑請追欵諭免之是年桂斌奏車盟報應費台吉已報未費者有六百餘員積壓未題者有三次之久諭理藩院迅速核辦不准積壓二十五年九月烏里雅蘇台將軍連順奏車臣汗德木楚克多爾濟阻撓贖務與俄人交密形狀可疑諭撤去差使十一月是部王公等又呈理藩院請停辦贖

務命崑岡等往勘緩之二十六年卒匪事起庫倫辦事大臣豐陞阿等調是部  
各旗官兵自備餉項巡防邊卡泊呼倫貝爾爲俄兵所據巴爾虎諸處避難官  
民均至是部界內盟長等防守撫輯均協所宜二十八年豐陞阿以是部王公  
異常出力請予獎勵於是車盟盟長郡王多爾濟帕拉木加親王銜副盟長扎  
薩克鎮國公車林尼瑪挑御前行走參贊扎薩克輔國公那爾莽達琿賞雙眼  
花翎餘給獎有差宣統二年二月內盟蒙匪托克托等竄擾是部貝子桑薩賴  
多爾濟旗三多遣駐庫宣化練軍營官鄭春田等迎擊失利電諭周樹模飭呼  
倫道汛派兵往接應而蒙匪竄俄境是年是部郡王多爾濟帕拉穆爲資政院  
欽選議員三年閏六月是部扎薩克貝子多爾濟車林等報効辦理新政銀兩  
獎之十一月哲布尊丹巴稱尊號于庫倫約是部王公扎薩克等附之是部車  
臣汗阿爾塔什達車林多爾濟父子皆爲烏里雅蘇台參贊大臣有鑛有鹽池  
有成吉思汗陵佐領共有四十

賽因諾顏部稱喀爾喀中路至京師三千餘重東界博囉布爾哈蘇多歡西界

庫勒薩雅索郭圖額金嶺南界齊爾里克北界齊老圖河元太祖十七世孫  
偉徵諾顏諾諾和有子五長阿巴和爲土謝圖汗部祖次塔爾呢無嗣次圖蒙  
肯次巴賚今賽因諾顏部二十四扎薩克自厄魯特二旗外皆其裔圖蒙肯子  
十三長卓特巴號車臣諾顏爲扎薩克輔國公托多額爾德尼諾爾布扎布台  
吉圖巴三旗祖次丹津喇嘛號諾們汗爲扎薩克親王善巴輔國公旺舒克車  
凌達什台吉齊旺多爾濟素達尼多爾濟六旗祖次車凌次羅雅克皆無嗣次  
濟雅克號偉徵諾顏爲扎薩克輔國公阿玉什一旗祖次扎木本其番不列  
扎薩克次察斯喜布號昆都稜爲扎薩克台吉伊達木納木扎勒二旗祖次丹  
津號班珠爾爲扎薩克超勇親王策稜子親王成衮扎布郡王車布登扎布二  
旗祖次畢瑪里吉哩諦號巴圖爾額爾德尼諾顏爲扎薩克台吉丹津額爾德  
尼一旗祖次錫納喇克薩特號琿台吉爲扎薩克台吉阿哩雅薩木濟特二旗  
祖次桑噶爾扎號伊勒登和碩齊爲扎薩克台吉沙噶伊爾都齊一旗祖次扣  
肯號巴扎爾爲扎薩克台吉濟納彌達一旗祖次袞布號昆都倫博碩克圖授

扎薩克郡王今襲貝勒其曾孫額墨根授扎薩克台吉又自爲一旗巴賚子一曰噶爾瑪爲扎薩克鎮國公素泰伊勒登一旗祖初喀爾喀有所謂紅教者與黃教爭圖蒙肯尊黃教爲之護持唐古特達賴喇嘛賢之授賚因諾顏號令所部奉之視三汗圖蒙肯卒次子丹津喇嘛復受諾們汗號於達賴喇嘛崇德三年遣使通貢優賚遣歸五年賜敕獎諭順治四年以借其旗土謝圖汗賚布等合兵援蘇尼特部叛人騰機思詰責之七年遣子額爾德尼諾木齊上書乞好詔借賚布約誓定議十一年額爾德尼諾木齊復奉表諭曰爾奏言喀爾喀左翼四旗皆爾統攝凡有敕諭罔弗遵行今卽如所請可速敕爾部長遣子來歸有不遵者卽行奉聞十二年借賚布等各遣子弟來朝詔宥前罪尋設八扎薩克命丹津喇嘛領左翼扎薩克之一歲貢九白如三汗例十八年賜遵文順義號給之印康熙三年詔所屬毋越界游牧丹津喇嘛卒子塔斯希布襲塔斯希布卒子善巴襲賜信順額爾克岱青號二十七年噶爾丹掠喀爾喀善巴率屬來歸詔附牧烏喇特諾部界三十年駕幸多倫諾爾會閱詔封善巴等王台吉

有差各授扎薩克編所屬佐領隸土謝圖汗部三十一年善巴從弟策稜來歸策稜者圖蒙肯第八子丹津之孫台吉納木扎勒之子後授固倫額駙和碩超勇親王定邊左副將軍兼稱喀爾喀大札薩克者也三十六年詔善巴等各歸舊牧五十六年選兵赴阿爾台軍偵禦策妄阿喇布坦雍正三年上所部系出賽因諾顏較三汗裔繁衍而額駙策稜自簡任副將軍勞績懋著命率近族親王達什敦多布貝勒納木札勒齊素噶貝子策汪諾爾布輔國公阿努哩敦多布額琳沁札木禪旺札勒台吉格木丕勒齊旺錫喇札布達爾濟雅根敦車布登巴朗延達博第呢瑪特克什諾爾布扎凡十九扎薩克別爲一部以其祖賽因諾顏號冠之稱喀爾喀中路不復隸土謝圖汗部喀爾喀有四部自此始九年所部兵隨大軍勦噶爾丹策凌擊其衆克爾森齊老及額爾德尼昭大敗之十三年徵還乾隆元年選兵赴鄂爾坤防秋六年參贊大臣副都統慶泰察閱防秋兵於桑錦托羅海十三年選駝五百運歸化城米赴塔密爾軍營尋調所部兵二千駐防錫喇烏蘇十九年移塔密爾軍營于是部中前旅之烏里雅蘇

台以是部兵分駐扎布堪二十五年隨大軍勦達瓦齊平之二十六年設烏里雅蘇台至烏魯木齊台站留侍衛四員餘撤之先是喀爾喀分設中路時但以賽因諾顏名其部以示別於三汗未議襲號三十一年親王成衮扎布奏所部來歸初親王善巴爲同族長又世掌丹津喇嘛所遺印請視三汗例以善巴曾孫親王諾爾布扎布襲賽因諾顏號詔允其請俾與土謝圖汗車臣汗扎薩克圖汗均世襲罔替蕩平準部之役成衮扎布長子額爾克沙喇以勦叛賊巴雅爾功封輔國公策凌次子輔國公車布登扎布積俘準部宰桑庫克辛等平達瓦齊誅賊固爾班和卓征哈薩克功歷晉貝子貝勒郡王至親王品級貝子車木楚克扎布稜捕獲烏梁海宰桑復設臺站及招降阿爾泰淖爾烏梁海功歷晉封至郡王扎薩克等台吉三都克扎布以協濟軍需復予襲輔國公扎薩克一等台吉達什額以得叛賊布庫察罕功予公品級而貝子羅布藏車隣以死事烏魯木齊晉其子貝勒初所部十九旗後增三旗附額魯特二旗扎薩克二十有四盟於齊齊爾里克設正副盟長各一副將軍參贊各一爵三十有三扎

薩克和碩親王二附固山貝子一由貝勒降襲鎮國公一由貝子降襲輔國公  
二公品級一等台吉一公品級三等台吉一扎薩克多羅郡王二一由鎮國公  
晉封扎薩克多羅貝勒二一由郡王降襲一由鎮國公晉襲扎薩克鎮國公一  
由扎薩克台吉晉襲附輔國公一扎薩克輔國公五一由扎薩克台吉晉襲公  
品級扎薩克一等台吉一扎薩克一等台吉九附輔國公一公品級三等台吉  
一厄魯特扎薩克固山貝子二一由郡王降襲一由輔國公晉襲三十八年九  
月以賽盟郡王車登扎布爲烏里雅蘇台參贊大臣四十二年十月賽盟郡王  
車布登扎布率本部王公扎薩克台吉等進大行皇齊醮馬蛇溫諭却之四十  
五年六月以賽音諾顏部落占據土謝圖汗游牧諭博清額查明毋使侵占十  
月定賽音諾顏土謝圖汗兩部界址嘉慶四年是部親王御前大臣拉旺多爾  
濟等請調集本盟兵馬助勦教匪溫旨止之並命理藩院傳知蒙古各盟停其  
預備七年八月定喀爾喀賽因諾顏扎薩克圖汗二部事務在烏里雅蘇臺會  
集與定邊左副將軍一同辦理八年以是部齊巴克扎布旗容留種地民人命



交烏里雅蘇台參贊大臣永保辦理十二年五月烏里雅蘇臺參贊大臣薩木不爾部爾濟卒以綸布多爾濟代之道光三年七月以賽音諾顏盟長德木楚克扎布等于大路搶劫官人財物不能捕緝詔嚴議十月烏里雅蘇台將軍果勒豐阿奏烏里雅蘇台地方請准令商民等每年駛運茶七千餘箱赴古城兌換米麪如不敷令湊買雜貨仍照例給發印票不准另往他處六年十一月回疆軍興賽音諾顏扎薩克圖汗兩盟王公扎薩克等輸駝隻助軍七年十月綸布多爾濟調庫倫辦事大臣十二月以車林多爾濟爲烏里雅蘇台參贊大臣十八年以哈薩克圍入卡倫命車輪多爾濟統賽扎兩盟杜爾伯特等蒙兵逐之十九年正月給驅逐哈薩克之賽扎兩盟蒙古官兵俸賞行裝銀四月命車輪多爾濟調兵驅逐復入烏梁海之哈薩克八月以驅逐哈薩克安速賽車林多爾濟親王俸一年二十五年二月賽盟郡王圖克濟扎布以不赴軍營革副將軍咸豐三年賽扎兩盟王公扎薩克等請捐助軍需溫旨卻之阿爾薩什達代之十一年阿爾塔什達調庫倫以車林敦多布代之同治三年回匪陷烏魯

木齊各城調是部兵援古城竟無功五年七月李雲麟奏與明誼等會商擬將扎薩克圖汗部賽諾顏兩部領兵全行派出共一千八百名其本愛曼操防之兵徐爲布置旋因察漢烏蘇卡倫聞警當與麟興等熟商北路既有警報擬每愛曼仍留五百兵備防本境復商之車林敦多布轉傳各盟長將西兩盟額兵以外之壯丁每盟再挑五百名於八月派齊隨後繼發並謂北路寇至不能禦差務不暇給保貝勒管不勒多爾濟遇事勇敢其才爲喀爾喀四部王公之冠適車林敦多布乞病詔卽以管不勒多爾濟代之李雲麟率賽扎兩盟兵西進十一月至呼圖古蘭臺扎盟兵變賽盟兵亦潰李雲麟自奏回烏城詔嚴責之七年管不勒多爾濟倡捐布倫托海新城經費借郡王桑噶西哩等捐銀二萬五千兩有奇予管不勒多爾濟王銜餘給獎有差九年二月肅州回匪東竄擾是部推河以西額爾德尼班第達呼圖克圖游牧蒙兵潰于哈爾呢敦閏十月己巳庫倫辦事大臣張廷岳等奏回匪竄偏烏城福濟榮全督蒙兵二百在城防守參贊大臣管不勒多爾濟督索倫滿漢兵五百迎擊駐頭台竄匪三千

其已抵二台辛未烏里雅蘇台將軍福濟等奏回匪踞博克多山推河口額爾德呢等處十月九日竄至第十一烏特台文報不通南臺蒙兵聞警先遁十一月戊申福濟及參贊大臣榮全奏十月九日賊千餘人由東南至西南山溝來撲東西南三門東溝又來賊數千初更賊四面放火燬柵而登城池失陷二十三日賊由西南竄去福濟遇救尙存榮全奔向西北於閏十月四日折回定邊將軍印信遺失榮全親兵護出伊犁將軍印信暫時借用命福濟榮全革職留任諭杜嘎爾統察哈爾馬隊及已調吉林黑龍江官兵赴烏城進勦尋回蒙西竄金山卡倫晉丕勒多爾濟回烏里雅蘇台諭整飭台站疏通道路十二月諭晉丕勒多爾濟將張廷岳撤回官兵分布防守推河等處福濟妥設霍呢齊及推河糧台癸酉錦丕勒多爾濟奏勒賽扎兩部落揀兵分紮烏城台站并防各旗游牧乙酉九福濟等請設烏城駐班台站扎薩克二員管台二員諭福濟迅將哈爾呢敦等台趕緊預備催綏遠城所遣達爾濟一軍前進是月喇嘛棍噶扎拉參一軍自科布多援烏城十年正月諭嚴催晉丕勒多爾濟設復烏城以

南台站首不勒多爾濟劾福濟謬妄貽誤自願身命將倉庫存項酬謝賊匪眷屬皆係自盡非爲賊所害福濟亦劾蒙古官員規避差使請捏病告假規避或飭傳故意遲行及始終不到者均革職任無職任者銷爵仍令來營從之設霍呢齊台轉運總局福濟飭賈果爾帶察哈爾馬隊駐守之榮全奏親往催辦烏城以南二十台行抵推河見水台厓房駝馬漸集推河至哈爾呢敦五台照舊布置略有規模請給自備駝馬劑台之蒙古台吉丁戶一半錢糧從之以回匪復圖再擾烏城諭福濟等整頓台站杜噶爾軍毋得逗留二月諭福濟等妥爲布置哈爾呢敦額爾德尼昭推河三處防守並以達爾濟一軍行抵哈爾呢敦阻滯飭督令各台站妥爲供支毋誤戎機三月以烏屬各臺尙未備齊致滯師行諭切責福濟並令傳知蒙古王公等率屬守禦于烏城殉難蒙兵卹杜噶爾奏派蘇彰阿帶黑龍江兵五百赴烏城並調賈果爾一軍赴前敵各路諭杜噶爾爾赴察爾呢敦等處防勦四月于登盟台吉車登不勒吉雅捐銀勦獎杜噶爾進駐貞鄂博地方諭福濟等飭蒙古台站應付駝馬等項錦不勒多爾濟以請

歸游牧罷烏里雅蘇台參贊大臣下院嚴議以扎盟中左翼左旗貝勒多木沁扎木楚代之福濟亦革任以金順爲烏里雅蘇台將軍奎昌署之回匪復擾是部阿米爾畢特游牧焚掠固爾班賽汗等處諭杜嘎爾會奎昌等迅速追勦五部回匪竄薩哈爾呢敦附近之薩巴爾圖河推河一帶杜嘎爾遣納魯肯一軍駐翁音驛防之六月回匪竄擾霍爾哈順霍呢齊二台諭慶春飭達爾濟於推河等處防守杜嘎爾撥隊扼要駐紮保護糧路福濟等奏烏城調到吉林黑龍江察哈爾馬隊三千二百五十名發圖車賽扎四盟採買駝馬等銀各一萬兩八月回匪復竄入阿畢爾密特旗至巴彥罕山逼近翁音河福濟等飭賽盟速派蒙兵五百名赴南台哈爾呢敦堵截九月達爾濟一軍勦竄翁吉河之匪殄之杜嘎爾遣福珠哩率兵勦匪于阿米爾密特旗之那林渾節等處殄之是旗附近肅清達爾濟亦敗賊於喀雅喀拉烏蘇地方十一年正月肅州回匪復竄擾是部阿米爾密特旗游牧西南之濟爾哈朗圖地方諭金順奎昌等各設法保護所屬台站杜嘎爾奏派富珠哩一軍扼紮哈爾呢敦一帶四月回匪竄擾

白託羅蓋及金山卡倫游牧奎昌等遣馬隊追勦九月連敗之於沙爾魯爾頓及庫爾庫噶地方匪自阿育爾公旗竄扎哈沁十二年二月烏里雅蘇台將軍長順等以回匪屢擾三扎兩盟牧暫令扎盟公車德恩敦多布多爾濟旗移於邊界相當之三音諾顏部落右翼右後旗副將軍王格里克扎木楚扎薩克瑪尼巴拉等旗游牧賽盟扎薩克阿畢爾密特旗移於本部賽音諾顏旗親王車林端多布等旗游牧兩盟南界金山卡倫亦令暫撤俾作清野之計奏入得旨下所司知之十三年正月烏城解嚴長順等撥察哈爾新兵五百令佐領依楞額統赴科布多裁烏城賽扎兩盟防兵五百侍衛豐陞阿統察哈爾馬隊仍駐扎巴罕河六年以改議俄約調賽扎兩盟蒙兵二千名駐烏里雅蘇台七月以將軍春福等奏克輔國公額爾奇博爾豁地方作爲官屯九月予賽盟扎薩木濟爾哈朗報効屯地獎七年六月以俄約成撤駐烏城之賽盟蒙兵將軍杜嘎爾奏暫停辦博爾豁屯田十一年九月復設金山卡倫十三年著烏里雅蘇台將軍祥麟等奏管理推河扎克等台吉巴扎爾等報所屬都特庫圖勒等三台

鼠災請將都特庫圖勒台暫移在諾們汗沙畢游牧內拜達里克河邊之敖爾楚克哈克圖地方扎克和博勒庫根兩台向前移在賽盟右翼右後旗郡王吹蘇倫扎布旗屬之扎綏額奇叟吉哈拉佈拉克等地方體察鼠災定息青草暢茂再飭各歸原台當差允之十九年烏里雅蘇台參贊大臣車林多爾濟病免以那木濟勒端多布代之二十一年十二月修烏里雅蘇臺二十三年修烏里雅蘇台河橋及河隄二十二年九月將軍崇歡奏查閱邊卡供給每台有加至百五十兩之事此次免去查閱南二十台駝馬兩廠專查五十五座台卡供給應付概從刪減二十六年崇歡奏以古城一帶蝗災改採購戍守官兵日需米麩於歸化城是年以拳匪肇衅邊防戒嚴將軍連順等調賽扎兩盟及烏梁海兵擇要防守各王公扎薩克等挑選壯丁籌幫軍食均能嚴約屬下勿欺凌俄商保全大局二十八年請將奏入子賽盟盟長扎薩克郡王沙蘇倫多布親王那木囊蘇倫副將軍朮薩克鎮國公剛珠爾扎布副盟長扎薩克郡王固嚕固木扎布等獎有差特予參贊大臣那木濟勒端多布黃馬褂二十九年設烏城

中俄通商事務局三十年八月連順等以賽扎兩盟呈報去冬今春雪灾牲畜  
倒斃三十一年是部中左末旗親王那彥圖請裁佐領所遺差戶護將軍奎煥  
飭由本明各旗分派按旗接充入夏亢旱駝馬疲瘦請緩查閱台站尤之三十  
二年賽盟盟長吹蘇倫扎布卒將軍奎煥等請于參贊大臣貝勒車登索諾木  
親王那木囊蘇倫二員內簡一人爲盟長得旨授那木囊蘇倫盟長定例盟長  
由理藩院請簡此出將軍保奏非恒格也那木濟勒端多布之後是部中左旗  
貝勒車登索諾木中右旗郡王庫魯固木扎布相繼爲烏里雅蘇台參贊大臣  
三十四年六月御史常徽劾車登索諾木捏報灾情本盟應派差使不遵奏章  
赴邊防守之差以賄爲定蒙情不服咸有戒心如牧廠未報地界任令開荒駝  
馬捏報倒斃孳生以多報少弊混不可枚舉宣統元年將軍壁岫查覆多爲寬  
解惟謂車登索諾木於本旗充當各差或有互調他旗以遠易近避重就輕營  
理旗務之扎齊克齊阿莫朦混自專請革之而爲車登索諾木請免議二年是  
部親王那木囊蘇倫那彥圖爲資政院欽選議員三年庫倫獨立是部王公附



之將軍奎芳被迫去職是部額駙策凌之後親王拉旺多爾濟車登巴咱爾達爾瑪那彥圖多至御前大臣領侍衛內大臣爲外扎薩克諸部所莫及是部地兼耕牧有鑛有鹽池向稱饒富共有佐領三十一

扎薩克圖汗部稱喀爾喀西路至京師四千餘里東界翁錦西爾哈勒珠勒西界喀喇烏蘇額埒克諾爾南界阿爾察喀喇托輝北界推河元太祖十六世孫格呼森扎扎賚爾琿台吉有子七分掌喀爾喀左右翼左翼牧圖拉河界右翼仍留居杭愛山其長子阿什海達爾汗琿台吉次子諾顏泰哈坦巴圖爾第四子德勒登昆都倫第七子鄂特歡諾顏同掌之今扎薩克圖汗部十九扎薩克自厄魯特一旗外皆其裔阿什海達爾漢琿台吉子二長巴延達喇子賚瑚爾汗爲原封扎薩克圖汗策旺扎布及扎薩克貝勒卓特巴台吉喇布坦額爾德尼衮布三旗祖次圖們達喇岱青子碩壘烏巴什號琿台吉爲扎薩克貝勒根敦輔國公沙克扎齊巴克扎布台吉納瑪琳藏布達什朋素克五旗祖諾顏泰哈坦巴圖爾生土伯特哈坦巴圖爾子二長崆奎號車臣濟農爲扎薩克郡王

朋素克喇布坦貝子博貝輔國公索諾木伊斯札布台吉烏爾占哈瑪爾岱青  
五旗祖次賽因巴特瑪號哈坦巴圖爾爲扎薩克輔國公衮占台吉伊達木扎  
布二旗祖德勒登昆都倫生鍾圖岱號巴圖爾爲扎薩克台吉諾爾布一旗祖  
鄂特歡諾顏生青達瑪尼默濟克號車臣諾顏爲扎薩克輔國公通謨克台吉  
普爾普車凌二旗祖初賽瑚爾爲喀爾喀右翼長所部以汗稱傳子素巴第始  
號扎薩克岡汗與其族土謝岡汗衮布車臣汗碩壘同時稱三汗碩壘通好最  
先衮布次之素巴第最後崇德三年以其部謀掠歸化城上統師征所部遁素  
巴第遣使謝罪並貢馬及獨峯駝無尾羊諭曰朕以兵討有罪以德撫無罪惟  
行正義故上天垂佑蒙古察哈爾諸部皆以昇朕爾等皆其所屬當卽相率歸  
誠不則亦惟謹守爾界乃反興兵構怨謀肆侵掠豈以遠處西北卽爲征討不  
及之區耶今與爾約嗣後慎勿復入歸化城界重貽罪戾五年復賜敕誠諭順  
治四年素巴第聞詔責碩壘衮布等納蘇尼特叛人騰機思及掠巴林罪欲代  
代解偕同族俄木布額爾德尼上書乞好上因其書不稱名詞近悖慢切責之

七年俄木布額爾德尼等詭稱行臘私入歸化城界掠牧產遣官飭歸所掠會素巴第卒子諾爾布爾稱畢錫喀勒圖汗遣使入貢諭曰朕本欲許爾等和好故命察歸所掠以贖前罪今爾等反以朕留爾逃人爲詞是何心耶朕統一四海爾等彈丸小國勿恃荒遠勿聽奸詞致隕爾緒十二年諾爾布借木布額爾德尼各遣子來朝謝罪十四年復偕同族車臣濟農昆都倫陀音奉表乞好詔宥前罪十六年遣大臣齋服物諭賚之先是喀爾喀左右翼設八扎薩克諾爾布及俄木布額爾德尼車臣濟農昆都倫陀音各領右翼扎薩克之一諾爾布卒子旺舒克襲仍號扎薩克圖汗俄木布額爾德尼卒子額璘沁襲號羅卜藏台吉康熙元年額璘沁以私憾襲殺旺舒克奔就厄魯特其叔父袁布伊勒登避難來歸封扎薩克貝勒駐牧喜峯口外察罕和朔圖詳喀爾喀左翼部總傳九年命旺舒克第成袁襲札薩克圖汗號輯其衆二十三年成袁以額璘沁之亂屬衆潰多往依左翼土謝圖汗察理多爾濟屢索不獲與璘斃命阿齊圖格隆等諭解之會成袁卒厄魯特噶爾丹謀掠喀爾喀誘成袁子沙喇攻察理多

爾濟沙喇因會噶爾丹於固爾班赫格爾台吉德克德赫等從往察琿多爾濟  
惡之追殺沙喇及德克德赫二十七年噶爾丹以兵三萬掠喀爾喀至杭愛山  
所部大潰沙喇弟策旺札布偕同族色凌阿海等相繼來歸詔附牧烏喇特諸  
部三十年駕幸多倫諾爾會閱以所部屢經變亂被芟夷詔封色凌阿海等王  
貝子台吉有差各授扎薩克令集所屬編佐領撫輯之而以策旺札布爲扎薩  
克圖汗成衞子特封和碩親王統其衆自是始稱扎薩克圖汗部三十一年定  
所部爲喀爾喀西路三十六年詔歸杭愛山游牧四十年賜牧產贍之尋命策  
旺札布仍襲扎薩克圖汗號雍正四年遣額駙策凌等赴阿爾台勘所部與準  
噶爾界九年大軍勦噶爾丹策凌詔所部扎薩克等內徙游牧十年以準噶爾  
敗遁諭曰去歲朕降旨令爾等徙居內地並不感悅導行屢次催促始勉強遷  
移今幸大軍於蘇克阿勒達呼及額爾德尼昭兩收賊衆爾等始得安居否則  
豈能保護牲畜乎朕思爾等本屬一體豈有甘居庸懦受人庇蔭之理嗣後各  
宜激烈奮發不惟永享昇平亦且垂先史冊矣是扎薩克圖汗策旺札布以從

征退縮罪削爵詔郡王朋素克喇布坦子格喀克延丕勒襲汗號十二年調兵駐防察罕庚爾乾隆元年選兵赴鄂爾坤防秋二年定邊大將軍平郡王福彭奏喀爾喀四部防秋兵皆駐鄂爾坤扎薩克圖汗部駐牧扎克拜達哩克西南距鄂爾坤尤邇請卽令在彼駐防徵調無難卽至詔如所請五年諭曰前以軍務方興恐爾部游牧被賊侵擾悉令內徙今噶爾丹策凌謹遵朕旨奏稱不敢越河爾台游牧甚屬恭順朕亦降旨令爾部游牧毋踰扎布堪齊克慎哈薩克圖庫克嶺等處爾等當徧諭所屬永遠遵行儻有違令生事者嚴行治罪況今雖許準噶爾和好罷息干戈而平日不可不訓習武備爾等其留意毋忽六年命參贊大臣副都統慶泰察閱防秋兵於哈里勒邁十三年選駝五百運歸化城未赴塔密爾軍營十六年敕禁所部越境與準噶爾及回衆私市十七年選兵千駐防錫喇烏蘇二十年隨大軍進勦達瓦齊二十二年以其部和托輝特郡王青衮咱卜叛誅之尋諭扎薩克圖汗部曰前因青衮咱卜負恩背叛散布流言衆喀爾喀間有煽動經朕訓諭爾等旋知悔悟各奉職守令逆賊就誅然

附人等應分別治罪以彰國憲但爾等爲國家臣僕百餘年誤聽浮言致干罪戾並非有心附賊免其查究嗣後益宜仰體朕恩滿瀛前愆約束所屬各安本業綏靜邊隅長享太平之福先是扎薩克圖汗部編佐領蕩平準回之役是部扎薩克郡王品級貝勒青衿咱卜貝勒連登扎布皆以叛誅而輔國公旺布多爾濟積俘青衿咱卜及準部叛賊呢瑪功晉襲貝勒子郡王品級一等台吉扎薩克朗衮扎布積取庫車援賊及克庫車功晉至鎮國公二等台吉諾爾布以不從叛賊策登扎布授扎薩克一等台吉死事於阿里固特之二等台吉齊巴克扎布追封輔國公并授其子巴圖濟爾噶勒扎薩克其扎薩克一等台吉噶爾丹達爾扎以率其屬戶口自準部特穆爾圖諾爾游牧復歸授一等台吉其後授其子拉克沁噶喇扎薩克編佐領隸是部先是扎薩克圖汗部編佐領分十旗後增八旗附厄魯特一旗扎薩克十有九盟於扎克畢賴色欽畢都哩雅諾爾設正副盟長各一副將軍參贊各一爵二十有二扎薩克圖汗兼多羅郡王一附公品級三等台吉一由輔國公降襲郡王品級扎薩克多羅貝勒一扎

薩克鎮國公二一由貝勒降襲一由扎薩克台吉晉襲扎薩克輔國公六一由貝子降襲附輔國公一扎薩克一等台吉八附輔國公一厄魯特扎薩克一等台吉一乾隆四十五年以是部扎薩克巴哈圖爾侵佔杜爾伯特游牧嚴飭查辦促令交還嘉慶七年十月收扎薩克圖汗布尼喇特納等進馬五百匹道光六年回疆軍興是部捐駝馬助軍需二十五年定札薩克圖汗盟支差章程王公台吉等將所屬喀木齊罕阿拉巴圖等牲畜分作二分一分牲畜津貼佐領等出差扎薩克台吉喀木齊罕阿拉巴圖等所有牲畜依佐領等一律按戶扣除大牲畜一雙餘次牲畜均與應派佐領下人等正項差務一律出派其貧苦台吉佐領下喀木齊罕阿拉巴圖等各均相監之咸豐三年是部汗王公扎薩克等以軍興捐助軍需溫旨部之同治三年回匪陷烏魯木齊等城古城諸城被圍調是部蒙兵援之五年十一月李雲麟奏扎盟蒙兵抵呼圖古蘭臺劫掠變亂尋潰歸九年六月肅州回匪擾是部境十月竄聚博提哈拉烏蘇庫努克等處殺掠十月匪于陷烏城後竄金山卡倫察罕博克多地方十一年十月

奎昌等奏移翰克巴雅爾所部察哈爾馬隊駐扎盟察罕淖爾地方防回匪犯烏城九月回匪竄是部輔國公車德恩敦多布多爾濟游牧車德恩敦多布多爾濟自備軍裝軍火糧餉督台吉官兵于十六十七日再挫匪于景色圖及巴彥察汗地方匪向西遁事聞予貝子銜十二月擾科城之回匪竄聚於扎部南境奎昌派達爾濟帶隊攻勦十二年正月奎昌等奏回匪于十一月竄扎盟所屬之那瑪勒吉幹昭地方官軍于是月十一日進攻敗之匪卽北竄追勦至十二日匪又向察罕布爾噶奔竄山勢險隘負固相持達爾濟趕帶馬隊前進匪又越山遁聚巴里坤扎盟交界地方二月烏里雅蘇台將軍長順等以扎盟牧南各旗毗連肅州屢被回匪擾害奏暫移公棍楚克扎布右翼前扎薩克桑青齊蘇隆右翼後末瑪呢達拉等旗於本部扎薩克圖汗及右翼中參贊公密帕散布中右翼末旗達什拉布坦扎薩克車德恩多爾濟等旗游牧扎薩克圖汗旗移本部落右翼左公銜扎薩克班扎班咱爾扎布右翼末次扎薩克達散巴拉等旗游牧俟賊匪肅清卽令各歸舊牧下所司知之十月回匪竄擾圖謝公



游牧旋擾察幹河及莫爾根地方長順等遣卓凌阿勦匪于圖謝公游牧之庫布奇爾果羅地方勝之救出蒙右男婦子女一百九十餘名科布多所遣防禦喜莫得等率兵敗匪于阿方公旗庫倫喇嘛地方救出被脅蒙民男婦三四百名會棟呢特多爾濟軍敗之於烏蘭壩匪向翰克扎薩克旗以南踰山逃遁十三年三月予扎薩克圖汗等捐助烏里雅蘇台城獎光緒初烏魯木齊諸城克復是部始解嚴七年徵是盟兵戍科布多俄約成撤去二十一年是部以甘肅回匪滋擾文報改由台路撤回邊界游牧牲畜爲堅壁清野之計二十三年烏里雅蘇台將軍崇歡等劾盟長扎薩克鎮國阿育爾色德丹占扎木楚假公攤派請革職任允之二十四年是部與賽音諾顏部王公扎薩克等輪昭信股票銀並請報効仍予獎二十五年是部扎薩克蘇多爾濟旗與科布多之扎哈沁爭界志銳等奏所爭一爲巴爾魯克鄂博一爲翰吉爾圖鄂博一爲由德克庫與喀拉占和碩界線請飭理藩院秉公剖斷允之二十六年拳匪肇畔邊防戒嚴是盟王公扎薩克等于徵兵籌餉均得出力二十八年予扎薩克圖汗索特

那木拉布坦副將軍扎薩克輔國公洛布桑端多布獎有差宣統二年索特木  
拉布坦爲資政院欽選議員三年庫倫獨立曾是部汗王等附之是部有鑛有  
鹽佐領有二十一

藩部五

青海額魯特

青海額魯特部在西甯邊外至京師五千七十里東及北界甘肅西界西藏南界四川袤延二千餘里卽古西海郡地分左右二境左境東自棟科爾廟西至洮資河界八百餘里南自博囉充克克河北岸北至西喇塔拉界四百餘里東南自喇拉山西北至額濟內河界四百餘里東北自永昌縣界西南至布隆吉爾河界三千餘里右境東自棟科爾廟西至噶斯池界二千五百餘里南自漳臘嶺北至博囉充克克河南岸千五百餘里東南自達爾濟嶺西北至塞爾騰西爾噶拉金界二千餘里東北自克騰庫特爾西南至穆魯烏蘇河界千五百餘里厄魯特舊分四部曰和碩特姓博爾濟吉特曰準噶爾曰杜爾伯特姓綽羅斯曰土爾扈特姓不著部自爲長號四衛拉特金稱厄魯特卽明時所謂阿魯台也有輝特者最微初隸杜爾伯特後土爾扈特徙俄羅斯境輝特遂爲四

衛拉特之一云青海蒙古分牧而處有和碩特有土爾扈特有準噶爾有輝特  
統以厄魯特稱之和碩特設扎薩克二十有一其始祖爲元太祖第哈布圖哈  
薩爾七傳至阿克薩噶勒泰子二長阿魯克特穆爾今內扎薩克科爾沁扎賚  
特杜爾伯特郭爾羅斯阿嚕科爾沁四部落茂明安烏喇特八部其裔也次烏  
嚕克特穆爾九傳至博貝密爾明稱衛拉特汗子哈尼諾顏洪果爾繼之有子  
六長哈納克十謝圖次拜布噶斯次昆都倫烏巴什次圖魯拜琥次色稜哈坦  
巴圖爾次布雅鄂特歡哈納克十謝圖爲公中扎薩克台吉車凌納木扎勒一  
旗祖拜布噶斯子鄂齊爾圖汗及阿巴賴諾顏牧西套後準噶爾滅其部昆都  
倫烏巴什號都爾格齊諾顏今駐牧珠都斯之和碩特部四旗其裔也圖魯拜  
琥號顧實汁分青海部衆爲二翼子十人領之居左翼者曰達延曰鄂木布曰  
達蘭泰曰巴延阿布該阿玉什居右翼者曰伊勒都齊曰多爾濟曰瑚噶木什  
曰桑噶爾扎曰袞布察理曰達什巴圖爾達延號鄂齊爾汗爲扎薩克鎮國公  
噶勒丹達什輔國公諾爾布朋素克車凌三旗祖別有附察哈爾之和碩特亦

其裔也鄂木布號車臣岱青爲扎薩克台吉羅卜藏察罕濟克濟扎布達瑪璘色布騰阿喇布坦四旗祖達蘭泰爲扎薩克郡王額爾德尼額爾克托克托爾台吉車凌多爾濟二旗祖巴延阿布該阿玉什號達賴烏巴什爲扎薩克台吉扎布一旗祖別有阿拉善厄魯特一旗亦其裔也伊勒都齊爲扎薩克親王察罕丹津輔國公阿喇布坦扎木素台吉察罕喇布坦三旗祖多爾濟號達賴巴圖爾爲扎薩克貝勒朋素克旺扎勒達什車凌合吉伊什多勒扎布三旗祖瑚噶木什號額爾德尼岱青爲扎薩克貝子丹巴台吉色布騰博碩克岡二旗祖桑噶爾扎號伊勒登爲扎薩克貝子索諾布達什一旗祖袞布察琿無嗣達什巴圖爾子羅卜藏丹津叛逃準噶爾後就擒宥之隸內蒙古正黃旗顧實汗弟色梭哈坦巴圖爾號扎薩克陀音爲扎薩克台吉哈爾噶斯一旗祖布延鄂特歡三傳至阿布子二長達瓦次鄂爾奇達濛隸準噶爾號扈魯瑪台吉後來歸達瓦封公品級尋卒鄂爾奇達濛授伯爵隸內蒙古正黃旗土爾扈特設扎薩克四其始祖曰翁罕七傳至貝果鄂爾勒克爲扎薩克台吉索諾布喇布坦多

爾濟色特爾布木二旗祖別有土爾其特部十二旗亦其裔也貝果鄂爾勒克弟翁貴爲扎薩克台吉澤爾扎丹忠二旗祖準噶爾設扎薩克二旗始祖曰孛罕六傳至額森子二長博羅納哈勒爲杜爾伯特所自始今駐牧烏蘭固木之杜爾伯特部十六旗自滿特二旗外年皆杜裔也次額斯墨特達爾漢諾顏爲準噶爾所自始七傳至和多和沁號巴圖爾琿台吉駐牧阿爾台子十一曰車臣爲其弟噶勒丹所殺曰卓特巴巴圖爾徙牧青海爲扎薩克郡王色布騰巴勒一旗祖色布騰扎勒再傳嗣絕曰班達哩孫車木伯勒襲色布騰扎勒所遺扎薩克曰卓哩克圖和碩齊爲扎薩克輔國公喇布坦一旗祖曰溫春子丹濟拉以來歸封扎薩克輔國公附喀爾喀賽因諾顏部曰僧格子策妄附喇布坦號琿台吉再傳爲其族達瓦齊所篡嗣絕曰噶勒丹以掠喀爾喀爲大軍所敗竄死曰布木號額爾德尼台吉其曾孫卽達瓦齊大軍平其部俘至京尋釋之封親王不列藩部曰多爾濟札布爲喀爾喀土謝圖汗察琿多爾濟所戕曰朋素克達什孫噶勒藏多爾濟以來歸對綽囉斯汗尋叛爲從子札納噶爾布

所殺曰噶爾瑪三傳至三濟札布以來歸授侍衛隸內蒙古正黃旗和多和沁弟曰墨爾根岱青子二長丹津號噶爾瑪岱青和碩齊孫阿喇布坦以來歸封札薩克郡王附喀爾喀賽因諾顏部次阿海三傳至達什達瓦嗣絕妻車臣哈屯攜衆來歸編佐領置直隸承德府境不設札薩克輝特設札薩克一其始祖曰納木占再傳至卓哩克圖和碩齊爲札薩克輔國公貢格一旗祖厄魯特諸扎薩克外設喀爾喀公中札薩克一別有察罕諾們汗授札薩克喇嘛轄四佐領自爲一旗不列諸札薩克盟天聰初蒙古諸部內附厄魯特猶私與明市上以遠弗之禁崇德二年順實汗遣使通貢閱歲乃至七年偕達賴喇嘛等奉表貢八年遣使存問達賴喇嘛以順實汗擊敗唐古特藏巴汗敕曰有敕道違法而行者聞爾已懲治之自古帝王致治法教未嘗斷絕今遣使敦禮高賢爾其知之并賜甲冑使未至順實汗請發幣使延達賴喇嘛允之順治二年順實汗子達賴巴圖爾貢馬至奏聞天使召聖僧臣等自當遵奉三年以厄魯特台吉等入甘肅境要糧賞詔所司議勦撫會順實汗奉表貢賜甲冑弓矢命轄諸厄

魯特喇開歲輒遣使至厄魯特台吉等附名以達和碩特族曰都爾格齊諾顏曰色稜哈坦巴圖爾曰鄂齊爾汗曰鄂齊爾圖汗曰阿巴賴諾顏曰達賴烏巴什諾顏曰伊拉古克三班第達呼圖克圖曰額爾德尼琿台吉曰阿哩祿克三陀音曰噶爾第巴台吉曰瑪賴台吉曰諾木齊台吉曰絳克圖台吉土爾扈特族曰羅卜藏諾顏曰楚琥爾岱青曰博第蘇克準噶爾族曰巴圖爾琿台吉曰墨爾根岱青曰杜喇勒和碩齊曰楚琥爾烏巴什曰羅卜藏呼圖克圖以順實汗爲之首五年甘肅巡撫王世功奏青海蒙古駐西甯需索供應請定貢使入關額餘駐關外給口糧許之九年順實汗導達賴喇嘛入覲先奉表聞并貢駝馬方物十年詔封遵行文義敏慧順實汗賜金册印十三年順實汗卒上念其忠勤修貢遣官致祭會青海屬復爲邊患諭順實汗子車臣岱青及達賴巴圖爾等曰分疆別界向有定例邇來爾等率番衆掠內地抗官兵守臣奏報二十餘次屢諒不悛今特遣官赴甘肅西甯等處勘狀或爾等親至或遣宰桑來質誣妄之罪各有攸歸番衆等俯納貢蒙古者聽爾轄僮係前明所屬應仍歸中



國至漢人蒙古宜界與市易隘口務宜詳加察覈分定耕牧毋得越境妄行十五年復諭車臣岱青曰前因爾等頻犯內地遣官往勘據奏爾等入邊向番取貢輒肆攘奪咎自難辭朕悉宥爾前愆但中外本無異視疆圉自有大防爾等向屬番取貢酌定人數路由正口遣頭目稟告守臣方准入邊至市易定所應從西甯鎮海堡川北洪水等口出入毋得任意取道如或不悛國愆具在朕不爾貸也康熙四年甘肅提督張勇奏蒙古番衆游牧莊浪諸境情形叵測請增甘肅西甯駐防兵先是青海蒙古戀西喇塔拉水草饒乞駐牧張勇以其地爲甘肅要隘不容偏處往責之謝罪去因設永固營聯築八寨至是蒙古等復相繼徙近邊上以漸不可啓詔如張勇請五年勇復奏青海雖通西藏不過荒徼絕塞朝廷曲示招徠准開市自應鈐束部落各安邊境乃邇來蜂屯祁連山縱牧內地大草灘曾遣諭徒復抗拒定羌廟官軍敗之猶不悛聲言糾衆分入河州臨洮鞏昌西甯涼州諸地請設兵備詔嚴防禦仍善撫以柔其心勇等乃自扁都口西水關至嘉峪關固築邊牆六年川陝總督盧崇峻奏青海諸頭目偵

於八月將入寇因赴莊浪所備之遣總兵孫思克屯南山隘相形勢固守達賴喇嘛尋檄厄魯特諸台吉毋擾內地駐牧黃城兒火草灘蒙古悉徙去獻駝馬等羊服罪請徹駐防兵尤之十四年西甯諸鎮兵屯河東勦叛賊王輔臣青海蒙古乘隙犯河西永固營副將陳達禦之陣歿孫思克屯涼州宣示朝廷恩威各引罪出塞會達賴喇嘛使至命傳諭達賴巴圖爾等戢部衆勿爲邊患十六年準噶爾台吉噶爾丹襲殺駐牧西套之鄂齊爾圖汗青海和碩特諸台吉懼挈廬幕數千避居火草灘撫遠大將軍圖海等飭歸故巢十七年西套諸台吉偵噶爾丹將侵青海遣使告和碩特台吉達賴巴圖爾等爲防禦計上聞之諭張勇曰噶爾丹侵青海如遠從達布素圖瀚海而往則聽之若欲經火草灘則令堅立信約勿擾內地尋噶爾丹以從者異志且距青海遠行十一日徹兵歸遣書張勇詭稱其祖多克辛諾顏借順實汗聚青海和碩特族獨據之欲往索以將軍所轄地故不果旣而懼和碩特諸台吉襲巴密遣使議婚以女布木妻博碩克圖濟農子根特爾張勇謄得狀奏噶爾丹警青海蒙古議婚後恐復往

侵甘肅當往來衝請增防上報可有巴圖爾額爾克濟農和囉理者巴延阿布該阿玉什子也駐牧西套以避噶爾丹侵乞假內地赴青海許之會噶爾丹屬額爾德尼和碩齊濟掠烏喇特戶畜青海墨爾根台吉聞之遣使詰歸所掠喀爾喀台吉畢瑪里吉哩謠亦以厄魯特掠所部陰偵之告額爾德尼和碩齊和囉理及青海台吉茂濟喇克等游牧額濟內河則未知其爲何厄魯特也十八年遣使諭達賴巴圖爾等曰爾墨爾根台吉將被盜劫掠人察護解送朕甚嘉之夫勸善懲惡者國之法也邇聞厄魯特衆棲處額濟內河爾達賴巴圖爾及墨爾根台吉其照汝例嚴加治罪使至稱茂濟喇克和囉理皆無掠烏喇特事額爾德尼和碩齊爲準噶爾屬已徙牧去詔檄噶爾丹收補之不從二十九年大軍敗噶爾丹於烏蘭布通青海諸台吉附達賴喇嘛表上尊號詔不允三十年甘肅提督孫思克奏噶爾丹巢距邊月餘從子策妄阿喇布坦雖交惡恐復含有侵青海舉道必經嘉峪關外肅州密邇青海設兵三千爲備上報可三十二年昭武將軍耶坦奏青海諸台吉私與噶爾丹通問請屯兵哈密絕往

來蹤上以噶爾丹自烏蘭布通敗遁後乏邊警且青海諸台吉素恭順寢議噶爾丹尋屯牧巴顏烏蘭徇內汛詔西甯設戍兵唐古特部第巴陰比噶爾丹詭爲達賴喇嘛奏稱青海諸台吉無異志請徹戍諭曰此爲征勦噶爾丹計非防青海諸台吉也會議勦噶爾丹詔檄青海衆勿驚懼三十五年上親征噶爾丹敗之獲青海通噶爾丹使以博碩克圖濟農及薩楚墨爾根台吉爲所部長遣使齎敕諭曰爾青海厄魯特尊崇達賴喇嘛法教敬事本朝聘問貢獻恭順有年朕亦頻加恩賚乃噶爾丹違達賴喇嘛法教不遵朕旨朕統軍至圖拉剿而滅之博碩克圖濟農等遣往噶爾丹使爲朕所擒俱言達賴喇嘛脫緇已久第巴匿之且噶爾丹詭言青海諸台吉謀與彼同犯中國令噶爾丹亡命西走青海諸台吉如欲仍前修睦其各防守邊界遇噶爾丹卽行擒解若知而故縱此後永誓絕之我使至察罕托羅海宣諭善巴陵堪布蓋達賴喇嘛遣理青海蒙古務者也善巴陵堪布召青海諸台吉集盟壇言曰噶爾丹殺鄂齊爾圖汗我等與仇但素奉達賴喇嘛言應遣議時達賴喇嘛示寂久唐古特達賴汗尋約

和碩特八台吉遣使慶捷達賴汗卽鄂齊爾汗子也世長唐古特鄂齊爾汗弟  
自袞布察琿無嗣外餘八人皆居青海故其裔稱和碩特八台吉三十六年二  
月上視師甯夏詔額駙阿喇布坦都統都思噶爾巴林台吉德木楚克西甯喇  
嘛商南多爾濟等攜青海諸台吉使及賞物往招撫之復以哈密達爾漢伯克  
額貝都拉內附詔青海厄魯特勿擾哈密境三月阿喇布坦等至察罕托羅海  
察罕諾們汗迎告曰皇上令青海衆得享安樂永受恩澤何幸如之時顧實汗  
子惟達什巴圖爾存阿喇布坦等宣諭之達什巴圖爾議遣博碩克圖濟農及  
額爾德尼台吉代入覲阿喇布坦等語曰皇上駕臨甯夏爾當率衆往朝毋自  
誤達什巴圖爾偕察罕諾們汗善巴陵堪布及唐古特達賴汗子拉藏等檄諸  
台吉議欲四月起行達爾寺垂絨呼圖克圖溫都遜寺達賴綽爾濟勒嘛及囊  
素通事等咸請從私向使問獅象狀且相謂曰我等往朝殆必以所未見文物  
相示閏三月阿喇布坦德木楚克自青海歸議諸台吉至若露處未協朝典應  
令秋後入覲京師詔如議命都思噶爾商南多爾濟留駐鎮海堡俟之扈蹕諸

臣奏青海厄魯特與準噶爾同部聞噶爾丹敗竄咸驚懼皇上定策安集所部身至如歸誠非常舉請行慶賀禮諭曰青海職貢有年來朝亦常事耳可勿賀諸臣固請因奉表賀曰青海向雖修貢未隸臣屬今舉部歸誠噶爾丹益無竄路皇上安內攘外之心自此充恢矣四月諭留糧騎及羊九千餘於達希圖海俟青海衆至給之十一月達什巴圖爾借諸台吉入覲諭曰朕非威懾爾等前來不過欲令天下生靈各得其所朕何物不備朕之尊不在爾等來否所望爾等各遂安全副朕好生至意耳詔所從諸宰桑咸列坐預宴以御用冠服朝珠賜達什巴圖爾賞諸台吉鞍馬銀幣有差復傳諭曰爾等自祖父來歲修職貢故特優錫以寵爾歸十二月上大閱玉泉山達什巴圖爾等扈駕往觀戰慄失色奏天朝兵威若此何敵不克三十七年正月詔封達什巴圖爾爲和碩親王諸台吉授貝勒貝子公等爵有差先是噶爾丹詭與青海媾實謀往侵懼大軍討乃寢第巴以策妄阿喇布坦不附噶爾丹陰間之僞爲達賴喇嘛疏奏策妄阿喇布坦將侵青海及唐古特上斥其妄會噶爾丹使至諭曰青海諸台吉奉

貢久僣噶爾丹屬犯青海朕必往討之至是噶爾丹就滅策妄阿勒布坦憾達什巴圖爾等內附詭請大軍征青海討前助噶爾丹罪諒曰青海諸台吉聞朕出師甯夏遠徙游牧噶爾丹平定親來稱慶伊等並無過端豈肯據爲加兵朕統馭天下惟願宇內羣生咸獲安堵豈有使爾等搆毀之理二月上幸五臺山詔達什巴圖爾等從將旋踵召覲行轅溫諒遣歸給駝馬三十九年策妄阿喇布坦聲言兵擊第巴遣使赴青海陰覘強弱上以策妄阿喇布坦將不靖詔廷臣留意漢趙充國所議五事爲防禦計四十二年上幸西安府達什巴圖爾等來朝扈駕閱駐防兵奏禁卒精練天下無敵外省軍容復如是億萬年可永享昇平賜宴遣歸五十四年策妄阿喇布坦遣兵掠哈密上以鄰青海左翼牧詔兵備之準噶爾敗遁初達賴汗子拉藏偕青海諸台吉定議內附尋襲唐古特汗以第巴私立僞達賴喇嘛襲殺之而自立博克達之伊什扎穆蘇爲達賴喇嘛瑚畢勒罕青海貝勒察罕丹津等訐其僞奏裏塘之羅卜藏噶勒藏嘉穆錯爲眞達賴喇嘛瑚畢勒罕詔內閣學士拉都琥往驗尋遣侍衛阿齊圖召青

海兩翼議徙裏塘達賴喇嘛畢勒罕以引爭端貝勒色布騰扎勒阿喇布坦鄂木布朋素克旺扎勒台吉達顏蘇爾扎等僉請徙察罕丹津不從將偕達什巴圖爾子羅卜藏丹津盟率兵攻異己者阿齊圖疏至王大臣等奏察罕丹津若先攻諸部色布騰扎勒等來奔應置邊內察罕丹津牧距松潘僅四五日程請備兵待詔西甯四川松潘諸路設兵備之五十五年察罕丹津畏罪徙裏塘達賴喇嘛畢勒罕至西甯宗喀巴寺阿齊圖奏請積諸台吉定盟以羅布藏丹津察罕丹津達顏等領右翼額爾德尼額爾克托克托與阿喇布坦鄂木布等領左翼合永睦允之會噶爾丹由沙拉嬰青海掠台吉羅布藏丹濟卜等牧畜復謀盜噶斯口官軍駝馬諭曰準噶爾偵噶斯口兵勢稍弱潛來侵擾青海不可不嚴籌之著西安口會青海左翼四川督標兵會青海右翼協力防禦五十六年遣使赴青海測分野未幾靖逆將軍富甯安謀策妄阿喇布坦遣兵赴唐古特馳疏聞上以裏塘達賴喇嘛畢勒罕事初定拉藏汗或陰導準噶爾侵青海詔理藩院尙書赫壽諭拉藏汗勿得與察汗丹津羅布藏丹津等構兵



復諭遣侍衛色楞等赴青海曰準噶爾若侵拉藏汗爾卽與青海諸台吉等定議協勦務令絕無猜忌不至滋變方善或拉藏汗導準噶爾侵青海爾卽諭察罕丹津等曰策妄阿喇布坦屢抗大軍今拉藏汗與同謀是顯爲讎敵也國家始終仁愛保護顧實汗子孫爾等正當奮志報效而行尋察罕丹津等以準噶爾侵拉藏汗告諭內大臣策旺諾爾布西安將軍額倫特等分屯青海要地五十七年拉藏汗乞援疏至詔色楞等會青海王台吉議進兵察罕丹津諜拉藏汗被戕謀誘準噶爾至青海迎擊之準噶爾懼不至先是哈密伯克額貝都拉獻西吉木達里圖西喇郭勒地詔設赤金靖逆二衛及柳溝所聽兵民耕牧五十八年以其地錯青海左翼牧道官借貝子阿喇布坦台吉阿爾薩爾等勘定界阿喇布坦等曰青海衆畜恩厚何惜曠地可耕者聽給兵民留我等牧地是矣因集所屬宰桑等畫地標識議勿私越時撫遠大將軍固山貝子允禎統兵駐西甯請自索諾木至柴達木路設站五站置青海兵十別令左右翼兵各三百屯近軍地防準噶爾賊從之允禎復遵旨集兩翼王台吉以上意宣諭曰唐

古特部達賴喇嘛班禪喇嘛法教原係爾祖頗實汗所設今準噶爾拔拉藏汗離散番衆爾等前稱裏塘羅卜藏喇嘛嘉穆錯爲眞達賴喇嘛班舉勒罕願置禪榻廣施法教今唐古特民人及阿木烏喇嘛如爾言皇上爲安藏計遣大兵送往唐古特爾等宜率所屬兵或萬或五六千從往其定議具奏兩翼王台吉等僉稱願聽命五十九年所部兵從大軍取準噶爾於卜克河齊諾郭勒綿瑪喇等處因護達賴喇嘛入藏捷聞詔留兵二千屯青海偵防準噶爾雍正元年諭曰自西陲用兵青海王以下台吉以上各著勞績皇考曾降旨俟凱旋日計功今青海王台吉等歷年效績應各酌加封賞其率兵進藏至駐防噶斯柴達木等衆應令各將將軍分別加賞是年羅卜藏丹津叛命大軍往討越歲而定羅卜藏丹津初襲其父達什巴圖爾親王府從大軍入藏歸覲爲唐古特長陰約策汗阿喇布坦援已復誘青海台吉等盟察罕托羅海令如所部故號不得復稱王貝勒貝子公等爵而自號達賴班台吉以統之郡王額爾德尼額爾克托克托館不從借鎮國公噶爾丹達什來奔上以和碩特族自相殘不忍遽

加兵詔撫遠大將軍貝子延信善慰額爾德尼額爾克托克托船時兵部左侍郎常壽駐西甯理青海務命傳諭羅卜藏丹津罷兵不從則懲治之羅卜藏詭言親王察罕丹津郡王額爾德尼額爾克托克托船謀據唐古特諸台吉不服將率兵與決勝負蓋以察罕丹津額爾德尼額爾克托克托船首不附己欲誣罪因脅諸台吉奉己如鄂齊爾汗駐唐古特以遙制青海也察罕丹津爲羅卜藏丹津所逼繼額爾德尼額爾克托克托船聚衆至敕川陝總督年羹堯曰羅卜藏丹津自其祖額實汗敬謹恭順達什巴圖爾慕化來歸晉封親王復令其子羅卜藏丹津襲封自宜仰體寵眷敬奉法紀乃妄逞強梁骨肉相仇欺陵親王察罕丹津郡王額爾德尼額爾克托克托船等恣行倡亂朕甫聞其事遣使往諭令伊講和修睦式好無尤乃肆意稱兵侵襲察罕丹津額爾德尼額爾克托克托船以致投入內境是其深負朕恩悖逆天常擾害生靈誅戮不可少緩朕欲大張天威特命爾爲撫遠大將軍統領大兵往聲羅卜藏丹津罪如敢抗拒卽行剿滅其黨有懼羅卜藏丹津勢暫爲脅從者果悔罪來歸卽行寬宥有

能擒斬羅布藏丹津者分別具奏有情急來歸者加意撫恤其不抗拒者毋加殺戮羅卜藏丹津詭罷兵誘常壽至察罕托羅海留之遣叛黨分掠西甯諸路煽賊番等爲應副將軍阿喇納自吐魯番馳赴噶斯斷山穆魯烏蘇往藏路副將王嵩參將孫繼宗等擊賊黨於布隆吉爾及鎮海堡申中堡北川新城等處四川提督岳鍾琪以雜谷土司等兵勦歸德堡外上寺東策卜下寺東策卜及南川口外郭密諸番復徵前鋒統領蘇丹等協勦所至告捷羅卜藏丹津懼送常壽歸請罪論年羹堯曰伊乃深負國恩與大軍對敵之叛賊國法斷不可宥不得因伊曾封王爵稍存疑慮其與羅卜藏丹津同謀之王貝勒貝子公等既經背叛卽宜削爵伊等或來歸順或被擒獲不必更論封爵但視行事輕重可寬宥者從寬應治罪者治罪二年詔以岳鍾琪爲奮威將軍參贊軍務鍾琪奉命進勦偵從賊之巴爾珠爾阿喇布坦自烏蘭博爾克遁尾擊之至伊克喀爾吉擒其黨阿喇布坦鄂木布道西甯總兵黃喜林山西爾哈羅色赴柴達木斷噶斯路偵羅卜藏丹津走烏蘭木和爾鍾琪復分兵馳擊擒其母阿爾泰俘戶

畜無算羅卜藏丹津借賊黨分道竄侍衛達鼐等擒丹津琿克吉於華海子阿布濟車臣台吉於布哈色布蘇吹喇克諾木齊扎什敦多卜等於烏拉克羅布藏丹津走準噶爾逆黨悉擒送京師詔行獻俘禮是役也以兵拒羅卜藏丹津者親王察汗丹津郡王額爾德尼額爾克托克托鼐也不從羅卜藏丹津逆者郡王色布騰扎勒台吉阿喇布坦噶勒丹岱青諾爾布巴勒珠爾察罕喇布坦旺舒克喇布坦也爲羅卜藏丹津脅從者貝勒朋素克旺扎勒輔國公車凌台吉諾爾布也始附羅卜藏丹津尋以悔罪宥者貝勒羅卜藏察罕車凌敦多布貝子濟克濟扎布拉扎布台吉袞布色布騰納罕伊什也其附羅卜藏丹津者首惡曰吹喇克諾木齊阿喇布坦鄂木布藏巴扎木從黨曰巴勒珠爾阿喇布坦扎什敦多布格勒克阿喇布坦巴蘇泰及察罕丹津從子塔爾寺喇嘛堪布諾們汗也有中甸者隸雲南麗江府羅卜藏丹津給偽劄令附已大軍至率戶三千餘請降洮岷界外諸番僑爲青海屬悉就撫其不順者勦誅之阿岡多卜藏瑪嘉鐸布納珠公寺朝天堂卓子山基子山先密寺興馬寺阿羅西脫巴上

篤爾素華藏上扎爾的諸番衆以次底定青海患始靖御製平定青海文立石  
台學王大臣等遵旨議善後事宜奏青海王台吉等應論功罪定賞罰游牧地  
令各分界如內地扎薩克例百戶置佐領一不及百戶者爲半佐領以扎薩克  
領之設協理台吉及協領副協領參領各一每參領設佐領驍騎校各一歲會  
盟令奏選盟長勿私推貢期自明年始分三班九年一周自備馬駝由邊入京  
市易以四仲月集西寧四川邊外納喇薩喇地官兵督視有擅入邊墻者治罪  
又羅卜藏丹津之吹宰桑及察罕丹津從子丹衷之宰桑色布騰達什等率衆  
降請各授千百戶等官又喀爾喀青海者勿復隸和碩特族令別設札薩克土  
爾扈特及準噶爾輝特如之至西番部衆凡陝西所屬甘州涼州莊浪西甯河  
州四川所屬松潘打箭鎗裏塘雲南所屬中甸等處或爲喇嘛耕地或納租青  
海但知有蒙古不知有應衛營伍諸官今番衆悉歸化應擇給土司千百戶巡  
檢等職令附近道廳及衛所轄又青海及巴爾喀木藏衛舊稱唐古特四大部  
顧實汗侵據之以青海地廣可牧畜巴爾喀木糧富令子孫游牧青海而巴爾

喀木納其賦藏衛二地舊給達賴喇嘛班禪喇嘛今以青海叛取其地應令四川雲南諸官管理又達賴喇嘛遣人赴市打箭鎗納稅請飭達賴喇嘛勿收鞍租打塘向喇嘛等索銀有差名曰鞍租至打箭鎗納稅請飭達賴喇嘛勿收鞍租打箭鎗免取稅歲給達賴喇嘛茶五千斤班禪喇嘛牛之又西寧各寺喇嘛多者數千少者以五六百易藏奸前羅卜藏丹津叛喇嘛率番衆抗大兵請於塔爾寺喇嘛選老成者三百給印照嗣後歲察二次廟舍不得過二百喇嘛多者百餘少者十餘番民糧賦今地方官管理度各寺歲用給之又陝西邊外河州西寧蘭州中衛甯夏榆林莊浪甘州等處水草豐美林麓茂密蒙古諸部戀牧大草灘及昌甯湖請於西甯北川邊外上下白塔等處自巴爾托海至扁都口築城堡令蒙古等勿妄據又肅州西洮賚河常堪爾鄂敦塔拉等處應募民墾膏腴地庶漸致富饒至甯夏險要無過阿拉善願實汗裔舊游牧山後今或徙至山前請令阿拉善扎薩克郡王額駙阿寶飭所屬歸阿拉善後其山前營盤水長流水等處悉爲內地又甘州西甯界各設營汛令蒙古等不敢覬覦又巴爾

喀木等部衆自魯隆宗東察木多乍雅外諸番目悉給印照視內地土司例又  
青海屬左格諸番請徙內地阿巴士司頭目墨丹桂等從勦有功請給安撫司  
銜不隸青海轄又西寧邊內可耕地請發直隸山西山東河南陝西五省遣犯  
能種地者官給牛具籽種三年後起科如例又甘州喀黃番應招撫爲青海藩  
籬青海諸部令各守牧地不得強據妄掠商賈察汗諾們汗喇嘛廟毋得私聚  
議事遣官齎敕往不論秩崇卑王公以下跪迎有背貳者必懲上從其議三年  
詔以博羅充克克地給阿拉善郡王阿寶居之鈐青海族屬越七載始徹歸是  
年青海和碩特土爾扈特準噶爾輝特喀爾喀及察罕諾們汗各授扎薩克鑄  
總理青海蒙古番子事務關防遣大臣齎鎮其地轄所部扎薩克岳鍾琪復奏  
親王察罕丹津鎮國公拉扎布等游牧河東地近河州松潘各路前議市納喇  
薩喇地地狹恐不給蒙古需請改市河州及松潘河州定於土門關附近雙城  
堡松潘定於黃勝關之西河口二地并有城屋水草美互市可久又郡王額爾  
德尼額爾克托克托顏色布騰扎勒等游牧河西地近西甯請改市西甯口外



丹噶爾寺至蒙古歲貢牲畜請每年六月後聽不時當易庶蒙古商衆獲利益  
允之六年唐古特部噶卜倫阿爾布巴隆布爾扎爾爾等叛擾唐古特謀通準  
噶爾大軍誅之七年上以準噶爾不靖必擾青海及唐古特因決策遣討王大  
臣等議噶斯爲準噶爾通青海及唐古特要隘請選青海扎薩克兵千五百分  
屯噶斯及柴達木得卜特爾察罕烏蘇諸路允之會噶勒丹策凌遣使告將獻  
羅卜藏丹津聞大軍就道懼仍攜歸八年詔暫緩進兵諭噶勒丹策凌速獻羅  
卜藏丹津當宥罪復命青海扎薩克備兵游牧聽調準噶爾尋襲科舍圖汎諭  
青海兵速赴噶斯準噶爾逝九年遣二等侍衛殷扎納傳諭左右翼扎薩克選  
兵萬屯青海適中地官兵皆賞裝復命所部採買牲畜勿滋擾扎薩克公諾爾  
布拉扎布等尋徙牧叛詔曰朕因準噶爾賊乘西路軍不備盜駝馬因愈海青  
各扎薩克人衆恐招逆賊侵害諭令派兵防護其採買馬羊者原欲使伊等所  
有牧畜得變價值可獲利益並非需此區區助也朕曾諭殷扎納一切派兵採  
買聽蒙古便不可絲毫勉強並慮王台吉等科派所屬諭令嚴行禁約豈肯令

遣往人逼迫蒙古從事乎今拉扎布等無故他徙或殷扎納不能宣揚朕諭使衆心共曉而探買馬羊又不聽從其便以致拉扎布等心懷疑畏漸避差徭特頒旨諭拉扎布等令其速歸本處準噶爾賊或由喀喇沙爾前赴噶斯潛行騷擾或增人衆窺伺青海所部蒙古兵丁尙未齊集器械亦未周備難望捍禦賊鋒亦令官兵善爲保護會拉扎布等不奉命諸扎薩克擒獻復集兵七千爲備軍械及馬不給上憫之諭廷臣曰朕所以聚此兵者特爲保全伊等家口及游牧計非爲征伐調遣用也今聞其生計情形朕心深爲惻然俟從容料理必有加恩之處所聚七千著選派三千照前所降恩旨官員賞給本年俸銀兵丁賞銀五兩戍卒駐防日久資斧維艱著給茶幣等項及每月所食青稞遣歸兵四千名官員等著給三月俸銀兵丁等著賞銀三兩令各回游牧準噶爾賊或潛擾青海朕意欲將伊等預行從容遷徙令賊由遠路來一無所得不待戰而力盡我官兵與賊交戰時青海三千兵但追襲賊後量力驅賊馬匹所得卽賞之仍計馬匹多寡加恩議叙十年以喀爾喀收準噶爾於克爾森齊老及額爾德

尼昭諭青海扎薩克等曰喀爾喀奮勇勦賊爾等何獨不能各宜鼓舞振興踊躍效命賊衆侵擾青海止有噶斯一路爾等須防守隘口儻準噶爾前來務期協力追殺悉行剿除十三年詔徹駐防大軍所部仍選兵二千屯得卜特爾伊克柴達木等汛以台吉達瑪璘色布騰色特爾布木領之乾隆十一年辦理青海事務副都統衆佛保遵旨宣諭諸扎薩克歲防汛議以郡王額爾德尼額爾克托克托爾之長子索諾木丹津及扎薩克台吉衞布喇布坦色特爾布木多爾濟色布騰薩喇等防得卜特爾汛以郡王衞楚克達什車凌喇布坦貝子丹巴輔國公納木扎勒車凌扎薩克台吉達瑪璘色布騰等防伊克柴達木汛十人爲五班三年一察軍械哈十二年以準噶爾使赴藏煎茶道噶斯復議自伊克柴達木得卜特爾外設汛哈濟爾察汗烏蘇二十年大軍征達瓦齊抵伊犁羅布藏丹津就擒諭曰羅卜藏丹津負恩背叛逃往準噶爾偷生三十餘載今兩路大軍至伊無路奔竄仍就擒獲實足以彰國憲而快人心羅卜藏丹津俘至告祭太廟社稷行獻俘禮上御午門樓受之以世宗憲皇后有羅卜藏丹津

至仍宥罪之旨詔免死子巴朗及察罕額布根授藍翎侍衛其戚屬處伊犛者詔勿內徙二十三年大軍勦瑪哈沁偵沙拉斯瑪呼斯賊竄呼爾塔克羅卜諾爾以地近噶斯通青海詔副都統濟福赴西甯宣諭所部集兵千爲備復遣噶斯道者偵賊蹤既而所部兵集扎噶蘇臺詔歸牧聽調勿遽就道濟福遵旨諭之請遣近牧者歸仍量留遠道兵屯烏圖備不虞上鑒其誠詔酌貧遣歸兵久之噶斯無賊蹤乃撤烏圖兵還二十四年陝甘總督楊應琚奏青海得卜特爾伊克柴達木等處設汛屯兵爲防準噶爾計今準噶爾及回部悉底定請撤青海駐防兵從之先是阿睦爾撒納叛大軍分道進勦所部購馬二千駝四百送巴里坤軍詔予值斃者半至是復輸馬七百餘駝三百二十餘請償斃數詔仍如值給二十七年以所部翁扎薩克請給羅卜藏丹津舊牧地楊應琚遵旨往勘奏洮賚河等處係西甯肅州鎮標馬廠及番族牧地不便撥給西喇郭勒及西爾噶拉金東西五百餘里南北三十餘里地曠且距扎薩克等游牧近請給其西爾噶拉金踰河卽產礦山場久封禁請飭扎薩克等就近守視詔以西

喇郭勒給之西爾噶拉金河東聽駐牧河西鉛礦勿得越界私採是年復設西甯辦事大臣轄蒙古番子事務所部扎薩克自察罕諾們汗外旗二十有九爵三十扎薩克多羅郡王三一由親王降襲一由貝勒晉襲扎薩克多羅貝勒二一由郡王降襲扎薩克固山貝子二一由輔國公晉襲扎薩克輔國公四一由鎮國公降襲扎薩克一等台吉十六一由貝勒降襲二由貝子降襲一由輔國公降襲附固山貝子一公中扎薩克一等台吉二十九十一月命青海各扎薩克每年輸派兵丁設卡防果洛克三十年九月以果洛克肆行劫殺諭青海各扎薩克協力勦之三十二年六月青海王貝子扎薩克等請留辦事大臣七十五不許七月諭四川禁果洛克土司番人越境掠竊青海蒙古牲畜九月移青海附近果洛克之各扎薩克駐牧地方添設卡兵十月以青海扎薩克羅布藏巴布騰等游牧爲果洛克番賊劫掠革之四十年九月青海扎薩克公禮塔爾以出獵被番賊戕害諭青海辦事大臣福德查辦五十一年九月禁青海喇嘛不領路引私自赴藏分青海納罕達爾濟等三旗兵羅布藏丹津袞楚克二

旗兵駐奎屯西哩克等處設果洛克防卡五十六年九月以青海郡王納漢達爾濟屬人勾引番子戕札薩克沙喇布提嚴飭之並諭各於境內游牧勿容匿番族十二月以大軍進藏征廓爾喀子親往巡查青海新設台站之貝子羅布藏色布騰貝勒銜鎮國公達瑪林貝子銜仍賚預備駝馬之王公扎薩克等有差五十八年循化等處番族佔居蒙古地界命辦事大臣特克慎以兵驅逐之嘉慶四年九月青海郡王那罕多爾濟等呈番子搶擄六千餘戶傷害男女二千餘人詔責辦事大臣奎舒諱匿革逮以台費蔭代之命廣厚赴西甯查辦十月以松筠奏命青海蒙古王公撫綏所屬毋致勾引番子搶劫五年六月青海貝勒克莫特伊什等番子交出牲畜較少諭台斐音下部嚴議九月台斐音以不准青海蒙古報被番子搶劫免以台布爲西甯辦事大臣六年十月以勘定青海卡倫禁蒙古擅出番子擅入十二月台布奏循化番子渡河搶劫諭飭撥兵防護七年二月台布令西甯鎮總兵保青署河州鎮總兵福甯阿撥兵駐守黃河水橋防護蒙旗果爾的等番族均欽迹諭台布責成蒙古設法自衛八月

台布奏番子格爾吉族縛獻犯事賊番撤坐卡官兵四月以循化貴德番子擾  
青海蒙古各旗切執貝子齊默特丹巴諭辦事大臣都爾嘉賡行查治五月諭  
都爾嘉撫恤青海被擾蒙古命貢楚克扎布會同都爾嘉查辦番案六月都爾  
嘉奏捕獲劫殺青海貝子夫人兇番齊克他勒誅之命陝甘總督惠齡赴西  
查辦野番撫恤青海被擾蒙古海口加給官茶一分七月命惠齡等妥酌防番  
卡倫章程貢楚克扎布等渡河驅逐野番八月貢楚克扎布奏野番退出占住  
蒙古地方移回番境命曉諭番目尖木贊交還贓畜縛獻賊目並飭定善後章  
程九年九月辦事大臣玉甯復以青海蒙古被番子搶劫之案甚多入告十年  
六月以青海郡王納幹多爾濟呈蒙古窮困諭玉甯遇水旱之災酌量賑濟七  
月諭玉甯飭郡王納罕多爾濟等勿令商人私挖木植大黃九月玉甯奏青海  
番子尖木贊等占據諾們汁等旗命貢楚克扎布赴西甯會同驅逐之十一年  
二月辦事大臣貢楚克扎布奏貴德循化番子頭目帶至開門內與西甯總  
兵九十西甯道慶奴傳見曉諭番目尖木贊策合洛等請每年各出羊隻租住

蒙古空閑地方今年三四月間劃定界限設立鄂博每年春季再添會哨一次六月貢楚克扎布奏番帳驅逐淨盡請以青海尙那克空地安插野番允之二十二年十月以青海扎薩克台吉恩凱巴雅爾捕獲劫奪蒙古果洛克番賊子花翎二十四年十二月護陝甘總督朱勳奏邊外番目縛獻番賊交出原搶蒙古人口牲畜予番目尖木贊四品頂戴道光二年正月以朱勳奏河北插帳之循化等處九族野番及鹽池一帶挖鹽番戶抗不回巢又蘊依雙勿兩族勾結循化貴德及四川野番盤踞原爲貝勒特里巴勒珠爾六旗游牧之助勸蓋克克烏蘇地方搶掠蒙旗請增卡防官兵允之命長齡回陝甘總督會松廷相機辦理設法驅逐三月長齡奏調官兵八千餘名分途併進迫令遷移五月長齡以勦捕蘊依等二十三族野番全數肅清奏聞諭飭妥籌善後事宜並曉諭蒙古王公等勉思振勦自相保衛六月長齡以貝勒特里巴勒等移居青海已久憚回原牧請以克勒蓋一帶令察罕諾們汗移居克克烏蘇一帶令阿里克阿百戶住牧停向年會哨之兵免究治諾們汗失察屬下勾結野番搶掠之咎允



之尋野番復出劫掠貝子喇特納希第游牧八月長齡以野番一千數百人過河殺掠聞命那彥成馳往查辦署陝甘總督責長齡辦理不善撤雙眼花翎十月那彥成奏酌設卡隘嚴捕漢奸並謂野番冥頑成性蒙古虐其屬下反投野番謀生導引搶掠其主內地歛家奸販潛住貿易無事則教引野番漸擾邊境有兵則潛過報信近年番勢日張弊實在此十一月增設西甯鎮鎮海協副將都司守備各一大通營游擊一哈拉庫圖爾營都司一哈瑪爾托亥營都司一雙俄卜營守備一千把以下弁兵有差以那彥成請以保衛蒙旗防禦番賊十二月那彥成奏察罕諾們汗所部夥同野番勾結漢奸作賊已久此次將糧茶斷絕立見窮蹙願歸河南游牧現押令過河上以不勞力不延歲月辦理認真嘉之定清厘河南循化貴德番族安插河北番族及易換糧茶章程設千戶百戶百總十總管束之封閉野牛溝八寶山等處偷挖金砂窩洞三年資青海被擾郡王車凌敦多布等二十四旗青夥三萬石十月允理藩院議覆那彥成奏分青海河北二十四旗爲左右翼每翼設正副盟長各一每六旗設扎齊克齊

一每三旗設梅楞一每旗設扎蘭一承辦巡防事件每旗出二十五人以五人爲一班每季更換隨同官兵巡防十八年玉樹熟番內雍希葉布蒙古爾津尼牙木錯卡愛爾四族以避果洛克番劫掠奔赴青海右翼盟長郡王恭木楚克集克默特願讓游牧內空閒地段住牧西甯辦事大臣蘇勒芳阿派員勘明其地東至和達素溝西至奎山口北至烏蘭麥爾河沿南至哈利益邊界于四至高阜處設立鄂博分定界址雍希葉布等四族計人戶二百有九男婦大小一千一百有八十名口議立交納馬貢易換糧茶各章程盟長等領百戶番目謁見蘇勒芳阿議定應行事宜額外苛派九月奏入得旨依議十二月青兩翼正副盟長郡主車凌端多布等呈蘇勒芳阿河南察罕諾們汗一旗被各番賊劫掠人戶失散現在催存三百餘戶日不聊生不及原來人戶四分之一請將該旗照舊移過河北與察罕洛亥駐防官兵協同把守渡口實與蒙古有益蘇勒芳阿奏卽飭貴德文武將該旗安分守法之人移過河北交車凌敦多布代爲管理仍飭留心稽查如有滋事作賊之人不準混淆移過以昭慎重從之二十

二年果洛克番賊竄青海掠蒙古及番族盟長郡王恭木楚克集克默特率兵  
勦捕俘番賊多名得所掠牲畜資糧正獎之二十三年七月以陝甘總督富呢  
揚阿等奏河北近邊番河南番族畏法酌撤各路官兵予出力左翼盟長郡王  
貝子索諾木雅爾吉獎分給在事蒙番牛羊一萬四千六百有奇二十四年三  
月錄斬擒偷渡河北番賊功予左翼副盟長貝勒羅布藏濟木巴雙眼花翎五  
月番族喀布藏與蒙古挾仇報復蒙兵敗之六月富呢揚阿奏派防兵並蒙古  
番兵按李于出巡前赴青海南適中之貢額爾蓋地方會哨是年僑居郡王恭  
木楚克集克默特旗之雅希葉布等四番族仍回原牧六平番賊復出劫掠命  
甘肅提督胡超赴永固勦之飭西甯辦事大臣德興駐丹噶爾六月陝甘總督  
布彥泰等奏勦黑錯寺番族竄遁酌量撤兵咸豐二年以陝甘總督舒興阿奏  
飭暫駐永安城之蒙古郡王等回牧裁察罕洛亥等處蒙古兵一半四年陝甘  
總督易棠奏于野牛溝三處招募獵戶各一千名開採金沙塔壘番匪同治三  
年飭山西籌解青海蒙古王公等歲俸以青海勦賊出力子扎薩克王烏爾琿

扎布等獎叙光緒元年九月西甯辦事大臣豫師奏捕獲柴達木搶殺番目之蒙古人犯諭免扎薩克達什多布吉議處仍飭認真約束四年十一月子青海歷年勦匪出力之副盟長貝勒拉汗多布吉等獎二十三年二月甘肅回匪劉四伏等率潰賊數萬人由南山水峽口竄青海格德地方貝子納木希哩率蒙兵右翼副盟長貝勒拉汗多布吉貝子吹木不勒爾布察罕諾們汗旗及剛咱族總千戶均派兵會合堵勦納木希哩等陣亡尋贈納木希哩郡王銜卹之是月十四十五等日匪竄左翼郡王崙克濟爾噶勒游牧都藍果立地方崙克濟爾噶勒派兵進擊匪遂竄柴達木勢張甚陝西巡撫魏光燾派遣員賡金清率馬隊山水峽口尾追甘肅提督董福祥派馬隊從丹噶爾日月山出口會兵海南一帶齊至都蘭果力地方前進劉四伏等竄踞遐力哈淨並腮什唐等地負隅死拒柴達木住牧之左翼盟長貝子恭布車布坦貝勒車琳端多布台吉索木端多布等親率蒙兵迎擊時口外盛雪嚴寒回匪無所得食飢凍斃者大半劉四伏等見勢不支遂向西分竄安西敦煌各境陝甘肅總督陶模派遣員潘

效蘇分兵由屬都口進戰西密辦事大臣奎順飭大通住牧之右翼正盟長郡王棍布拉布坦公齊克什扎布台吉丹把台吉齊莫特林增阿里克族百戶格拉哈官布等親督蒙番兵丁會合官軍分途兜勦公齊克什扎布手帶鎗傷裏創力戰劉四伏率匪西遁餘賊降於貝子恭布車布坦旗安插管束青海肅清陶模請獎奏入于郡王翰克濟爾噶勒等獎有差陶模等於丹噶爾廳設局以銀布糧茶賑被難各旗宣統二年四月郡王巴勒珠爾拉布坦爲資政院欽選議員三年四月密海左翼正盟長扎薩克貝勒車林端多布卒廣恕奏以本翼郡王翰克濟爾噶勒暫代之其地有鑛有鹽林木亦富佐領共一百有三